



15
1575
2

1



冊八
卷六
函七

門 15
號 1575
卷 2

皇清
御書

池北偶談卷四目錄

談故四之四

凡二十八期

山崎藏書

皇清御書

親謁孝陵

殿試改期

會試二亥

日講

朝報

臺灣府縣

東野氏世襲

階官避家諱

武職丁憂

訪遺書

皇清御書

御書

毀淫祠

戊己二官名

荷蘭貢物

四詹事

起復

試官

八旗開科

池北偶談卷四目

徵聘不至

祭北海

周張後裔

臺灣開科

滿洲鄉試

漢尚書

閣臣

千秋康氏

暹羅表

太皇太后朝儀

裙帶官

衫

停止閏月

長白山

山東解元

崇禎紀事

縣名避年號

玄狐

遵化改州

鄉飲酒禮

卷四目畢

池北偶談卷四

談故

濟南王士禎阮亭著 高都姪廷掄簡菴較

親謁孝陵

康熙甲子冬

大駕幸金陵親謁明太祖孝陵

上由

甬道旁行

諭扈從諸臣皆於門外下馬

上行三跪九

叩頭禮詣寶城前行三獻禮出復由甬道旁行賞賚守陵內

監及陵戶人等有差諭禁樵采令督撫地方官嚴加巡察

父老從者數萬人皆感泣總督兩江兵部侍郎王新命刻石

紀事己巳春南巡再謁孝陵古今未有之盛舉也

殿試改期

國朝每科 殿試之期在三月十五日自辛丑科後以三月十九日爲 萬壽節遂改 殿試於二十日至今爲例壬戌科 駕幸 盛京謁 陵改 殿試於九月二十日戊辰科以 大行太皇太后升遐改會試於二月十九等日 殿試改三月二十六日云

會試二亥

順治三年丁亥重行會試十六年己亥復重行會試

日講

今上親政後選翰林官直講 禁中先在 弘德殿後移於乾清宮講官始則熊賜復繼爲史鶴齡孫在豐張英徐元文陳廷敬葉方藹張玉書湯斌 允肅大抵以掌院學士一員與翰林官一員同講止 一員 戊午陳葉日講而 上幸南海子葉偶病假旬日以 張代之後葉疾愈入直遂三員同直講史以編修歸歿於家特 賜祭葬其恩禮非外庭所敢望也

朝報

今之朝報或曰邸報亦有所本見王明清揮塵錄趙昇朝野類要云朝報日生事宜也每日門下後省編定請給事判報方行下都進奏院報行天下其有所謂內探省探衙探之類皆衷私小報率有漏洩之禁故隱而號之曰新聞蓋自宋時已然又六科 綸音冊子號晚帖以當晚卽知之次日乃登邸報故曰晚帖亦有小報謂之小抄

臺灣府縣

康熙二十二年臺灣平設府一曰臺灣府縣三曰臺灣日鳳山曰諸羅又設總兵官分巡廈門道各一員駐焉幅員之廣古未有也

東野氏世襲

康熙二十三年上東巡周公後裔七十三代孫世襲奉祀生員東野沛然上疏頌恩奉旨交與該部禮部覆無庸議奉旨周公承接道統繼往開來功德昭著其子孫應給職銜着九卿詹事科道會同確議會議得周公後裔應授官職撥給祀田修葺廟宇行次該撫查明以沛然世襲五經博士如孔顏曾孟仲氏例先為沛然上疏行在 上召問周公

姬姓爾疏稱東野何故

曰昔魯公伯禽季子魚賜東

野田一成因以為氏

曰周公廟庭何在對曰在闕里

城東北二里

上悅隨

御製祭文遣

恭親王致祭禮

部尚書介山御前侍衛觀保鴻臚寺卿穆成格閩興邦太常寺寺丞張量馨山東提學道副使唐賡堯陪祭其後沛然卒子枝盛嗣為博士云是時子貢後裔端木謙端木直亦上疏請部議不允

階官避家諱

予嘗疑六朝以來朝廷為臣下避家諱至改州郡名者有之考愧郟錄乃知宋時律文有私諱冒榮徒一年之禁四銓之法遇磨勘階官之稱與其三代諱相值者許其自陳授以次

官謂之寄理遂以繫之官稱之首又李文簡燾奏疏亦載雍熙二年有詔凡除官內有家諱者三省御史臺五品文班四品以上許用式奏改餘不許嘉祐六年翰林學士賈黯知審官院奏准下太常禮院大理寺同議言祖父之名子孫所不忍道不繫官品之高下并當迴避乃詔凡府號官稱犯祖父名而非嫌名及二名者竝聽迴避其後韓絳除樞密副使自言樞字與祖名下一字同乞避免不許遵嘉祐之詔也宋敏求提舉萬壽觀敏求父名綬自言壽字犯父嫌名詔改醴泉觀則嘉祐之詔復不行矣及吳中復提舉荆湖北路兵馬中復父名舉乞改稱提舉中復官稱不當避守臣私諱遂不許然後知迴避私諱

前載在律文亦孝治天下之

意明代以來始刊削耳

引晉江統言其叔父春爲宜

春令與縣同名故事

名同皆得改選而未有身與

官職同名改選之例統以爲身名所加亦施於臣子凡佐史朝夕必稱厥官倘指實而語則觸尊者諱或詭詞迴避則以私廢公統以爲身名與官職同者宜與祖父名爲比武帝許之據此又不獨迴避先諱矣朝野類要云授職任而犯三代名諱者許避之而開禧初張嗣右除起居郎以犯諱辭免改名修注官其餘若一名偏犯則不避

武職丁憂

武職舊無丁憂之例康熙二十四年四川提督何傳疏言竊惟議禮制度聖王御世之大權地義天經人子立身之大本

養生莫如送死教孝所以作忠據夔州副將孫斌呈詳云通喪制禮既無貴與賤之殊沿例宅憂乃有文與武之別俱屬毛而離裏忍絕裾以滅親豺獮尚有一祭之知介冑豈無三年之愛臣久失怙恃見素鞵而興懷恭際休明瀝丹心而上請實天下萬世之公義非孫斌一人之私情伏懇特渙音定武職三年通喪之例垂光史冊云得 俞旨遂為定制孝治之隆變絕千古矣

又浙江提督陳世凱上言武臣丁憂特其一節宜令讀書識忠孝大義得 溫旨已後武臣俱當留心典籍責令提鎮倡率之

訪遺書

康熙二十五年四月

隆文典籍具備猶必

禮部翰林院自古帝王致治用充秘府以廣見聞而資掌

故甚盛事也朕畱心藝文晨夕披覽雖內府書籍篇目粗陳而哀集未備因思通都大邑應有藏編野乘名山豈無善本宜廣為訪輯凡經史子集除尋常刻本其有藏書秘錄作何給值採集及借本抄寫事宜爾部院會同詳議具奏務令搜羅罔佚以副朕稽古崇文之至意旋又奉 旨關係經史方許採進時禮侍徐乾學疏進宋朱震漢上易傳并圖說十五卷宋張浚紫巖易傳九卷讀易雜說一卷魏了翁大易集義六十四卷曾種大易粹言十卷呂祖謙東萊書說十卷元金履祥尚書表注十二卷宋李樗黃樵毛詩集解三十六卷趙

鴻飛春秋經筮十六卷王與之周禮訂義八十卷蔡節論語集說十卷李燾續資治通鑑長編一百六十八卷唐開元禮一百五十卷共十二部

御書

康熙二十三年 駕幸闕里 御書萬世師表四字懸大成殿次年以四字頒行天下學宮又 御書白鹿書院額廬山白鹿洞并賜監本五經四書其河南府二程祠邵康節祠鳳翔府橫渠書院建寧府紫陽書院徽州府文公闕里長沙府石鼓書院皆頒 御書學達性天大字古今罕觀之盛舉也

毀淫祠

康熙丙寅擢江寧巡撫

湯斌禮部尚書掌詹事府事

湯瀕行疏毀吳下淫祠

顯劉猛將五方賢聖等廟恭

請 上諭勒石上方

旨通行直省初湯以閣學遷

巡撫過予邸舍予為言吳中婦女好入寺院燒香首當禁止湯以為然在吳遂力行之風俗一變若淫祠一節尤於世道人心裨益不小湯自言昔為方面時只遵寧陵呂叔簡先生從政錄行之其撫吳亦此志云

戊己二官名

漢元帝初元元年置戊己校尉屯田車師前王庭班書師古注自甲至癸皆有正位唯戊己寄治今所置無常居故取戊己為名或云戊己居中鎮覆四方今所置校尉亦處西域之中撫諸國也然戊己自是兩官後漢耿恭為戊校尉關寵為

已校尉是也

荷蘭貢物

荷蘭國自康熙六年入貢今二十五年臺灣平設郡縣其王
 耀漢連氏甘勃氏遣陪臣賓先吧芝復奉表進貢表詞有云
 外邦之丸泥尺土乃是中國飛埃異域之勺水蹄涔原屬天
 家滴露云云貢物大珊瑚珠一串照身大鏡二面奇秀琥珀二
 十四塊大哆囉絨十五疋中哆囉絨十疋織金大絨毯四領
 烏羽緞四疋綠倭緞一疋新機嗶嘰緞八疋中嗶嘰緞十二
 疋織金花緞五疋白色雜樣細軟布二百一十九疋文采細
 織布一十五疋大細
 白毛裏布三十疋大白鳴鐘
 一座大琉璃燈一圓
 懸琉璃盞異式五百八十

一塊丁香三十擔冰片

八甜肉荳蔻四甕廂金小箱

一隻內丁香油薔薇花

油桂花油各一確葡萄酒二

桶大象牙五支廂金鳥銃二十把廂金馬銃二十把精細馬
 銃十把彩色皮帶二十佩廂金馬銃中用繡彩皮帶十佩精
 細馬銃中用精細小馬銃二十把短小馬銃二十把精細鳥
 銃十把廂金佩刀十把起花佩刀二十把廂金雙利劍十把
 雙利闊劍十把起金花單利劍六把照星月水鏡一執江河
 照水鏡二執雕製夾板三隻

四詹事

本朝詹事府屢裁康熙十五年立皇太子乃復設正詹兼
 翰林院侍讀學士少詹兼翰林院侍講學士至故友華亭沈

文恪公荃始以講筵勞加禮部侍郎二十五年東宮出閣

讀書乃召江寧巡撫都御史湯公斌以禮部尚書兼詹事

時詹事為郭公茶少詹事為盧公琦歸公允三公皆仍其舊

故同時有四詹事未幾郭遷閣學即以湯為正詹不另補

東宮初出閣欽定講官五人湯郭二公外則滿洲正詹尹

泰少詹舒左春坊中允閔世左春坊贊善黃與也郭既遷

去以右春坊諭德徐潮補充之予以少詹事予告在乙丑

起復

趙昇朝野類要云已解官持服而朝廷特再推用者名起復

起復即奪情也今人以吉為起復者誤

試官

今諸司官初選即實授御史中書舍人必先授試職

一年滿內閣都察院沿明舊例也按明初范敏試

吏部尚書李寬試禮部尚書徐恢試戶部尚書茹常試兵部

尚書開濟試刑部尚書楊靖王暹試侍郎詹徽茹太素試都

御史又有試給事中至正德中陸完為試都御史此例今人

不知

八旗開科

八旗鄉會試開科始於順治辛卯壬辰至丁酉停止康熙己

酉庚戌復舉行至丙辰停止丁卯夏五月以亢旱肆赦再復

開科之例○按開科之例前後稍有不同順治壬辰乙未滿

洲蒙古用滿文另為一榜壬辰狀元麻勒吉兩江總督庚戌

癸丑滿洲蒙古槩用漢文卽附漢人通爲一榜辛未甲戌復開科例仍之

徵聘不至

康熙己未博學宏詞之徵內外薦剡百八十餘人不至者四人浙江應撫謙嗣寅江西魏禧冰叔山西范鄩鼎彪西陝西李頤中孚范登順治辛丑進士闡明絳州辛復元全先生之學與應李以理學著於南北唯魏以古文擅名其兄際瑞弟禮皆有詩名時號寧都三魏

祭北海

丁卯四月副都御史徐請釐正祀典其略云臣按歷代祀典唐望祀北海於今河南府也宋望祀北海於

孟州卽今懷慶府也明望祀於懷慶府我朝典制東海祀於萊州南海祀於廣州二近海誠爲允當西海則於蒲州望祭蓋西海遙遠循宋明之舊而望祭之宜也至北海則仍祭於懷慶夫宋都於汴而懷慶在其北彼時幽燕皆非宋土卽出國門而望北一祭亦權宜之計有明定鼎燕京仍往南而祭北海我朝因之殆非宅中以蒞四海之義伏查北鎮醫無閭山在奉天府屬今爲北鎮山海關迤北之海非北海乎況盛京發祥重地土厚水深源流綿邈皇上聲教四訖幅員之大亘古未有長白山水并烏龍鴨綠諸江亦盡朝宗於海則北海之祭不應仍在懷慶此祀典之急宜釐正者伏查順治十七年科臣粘本盛題請改祭北岳於渾源

州祈下部議嗣後告祭更定於迤北近海地界云得旨下
九卿詹事科道會議上言明臣丘濬言京師東北乃古碣石
淪海之地於此立祠就海面祭為宜濬所云碣石今在永平
府但我朝幅員廣大混同江水發源長白流入北海今北
海之祭應改混同江邊望祭可也得旨允行

周張後裔

康熙二十四年僉都御史姚締虞言宋儒周惇頤有開繼之
功下部議得旨以惇頤二十九代孫嘉耀世襲五經博士
二十六年戶科給事中汪晉徵言孔孟以來道學之統至宋
周程張朱而始著乃程朱一久置世襲博士周惇頤子孫
亦為博士其張載子孫一亦為博士云九卿等覆議順治十

二年八月據江南布政使司呈請朱熹裔孫煌禮部題授世
襲五經博士康熙九年五月禮部覆御史傅世舟疏題授二
程裔孫程宗昌程延祀世襲五經博士二十四年四月九卿
詹事科道會議僉都御史姚締虞疏題授周惇頤裔孫嘉耀
世襲五經博士張載關中大儒與濂洛並重載裔孫亦應照
例授世襲五經博士陝西巡撫副都御史布哈疏請以載裔
孫張夢熊應詔夢熊未及襲而卒以其子從先為博士

臺灣開科

康熙丁卯夏四月福建提督張雲翼疏請臺灣鄉試宜照甘
肅寧夏例於闔場另編字號額中一二名禮部覆准臺灣新
經歸附文教初開應將臺灣一府三縣生員照甘肅寧夏之

例另編字號額外取中舉人一名得旨允行是科五十一名蘇峨鳳山縣附學生習易經

滿洲鄉試

丁卯夏 恩詔入旗滿洲蒙古漢軍原有定例同漢人一體開科取士前因用兵暫行停止今仍照舊舉行禮部題請於直隸舉人額外滿洲蒙古取中舉人十名另編滿字號漢軍取中舉人五名另編合字號漢軍稱烏金超哈故也會試亦於漢進士額外滿洲蒙古取中四名漢軍取中二名皆與漢人一體作文考試 盛京生員附入在京入旗本年鄉試期迫俟庚午辛未科舉行云

漢尚書

順治初始設漢尚書吏部陳名夏戶部謝啓光禮部李若琳兵部劉餘祐刑部党崇雅工部張鳳翔都察院掌院事左都御史房可壯後惟陳党二人拜相

閣臣

世祖時拜相者自同安洪文襄承疇外直隸四人涿州馮文敏銓靜海高文端爾儼大名成公克鞏高陽李文勤肅江南四人溧陽陳公名夏武進呂公官吳江金文通之俊高郵王文通末吉山東四人德州謝清義陞掖縣張文安端安丘劉公正宗聊城傅公以漸山西二人曲沃李公建泰衛文清周河南一人商丘宋文康權陝西一人寶雞克公崇雅浙江一人海寧陳公之遴四川一人井研胡公世安康熙已來拜相者直隸四人柏鄉魏公介裔寶坻

杜文端立 宛平王公熙 真定梁公清 江南五人 長洲宋文恪
德 崑山徐公文元 丹徒張公書玉 合肥李公天 桐城張公英 山東
三人 益都孫文定廷 臨朐馮文毅溥 武定李文襄之 山西一
人 沁州吳公璠 湖廣三人 孝感熊公履賜 漢陽吳文儔正 大冶
余公柱 浙江一人 錢塘黃文儔機 熊公罷相後再起為禮部
尚書 己卯復相

千秋康氏

本朝順治已來直省民間一產三男者歲有數十多不勝紀
定例官給米三石布十疋而已按南唐時金陵人康國輔娶
司馬氏一產三男唐主以為瑞皆封將軍號千秋康氏柳子
厚集有為廣南鄭尚書奏自姓一產三男狀後為休徵想爾
時此事絕少故以為祥瑞而優異如此

暹羅表

康熙二十三年暹羅國進表云啓奏 大清國 皇帝陛下
下伏以聖明垂統繼天立極無為而治德教乎施萬國不動
而化風雅澤及諸彝巍巍莫則蕩蕩難名卑國世荷 皇恩
久沾德化微臣繼襲踐祚身屬遐方莫能仰瞻 天顏幸遇
貢期敢効輸款願遣正貢使坤字述列瓦提二貢使臣坤巴
寶提瓦扃三貢使臣坤司吝塔瓦渣正通事坤思吝塔披彩
辦事文披述塔新禮嘑等檣航渡海齎捧金葉表文方物譯
書前至廣省差官伴送京師朝貢進獻代伸拜舞之誠恪盡
臣子之職恭祝 皇圖鞏固 帝壽遐昌伏冀俯垂鑒納庶

存懷遠之義微臣瞻天仰聖不勝屏營之至

太皇太后朝儀

舊制元旦冬至及太皇太后皇太后萬壽節

上詣兩宮行禮大學士尚書都統已上隨駕詣宮

前行禮侍郎已下則否二十年御史任某條奏部議隨駕官

如故侍郎已下於午門前行禮遂為定制

裙帶官

宋時親王南班之婿號曰西官又謂之裙帶官見朝野類要

彰

彰水在予邑東鄙古西安城下又姓也左傳文公十一年宋

公於是以前賞彰班漢書功臣表有芒侯彰距劉熙釋名曰

耳彰也

停止閏月

楊光先者新安人明末居京師以劾陳啓新妄得敢言名實

市僧之魁也康熙六年疏言西洋曆法之弊遂發大難逐欽

天監監正加通政使湯若望而奪其位然光先實於曆法毫

無所解所言皆舛謬如謂戊申歲當閏十二月尋覺其非自

行檢舉時已頒行來歲曆至下詔停止閏月光先尋事敗

論大辟光先刻一書曰不得已自附於亞聖之闕異端可謂

無忌憚矣○王蜀閏丙戌年正月後因胡秀林向隱異同未

得唐曆乃閏乙酉年十二月遂改用之宋元豐元年歲在戊

午閏正月知定州薛向繳進遼國曆乃在十二月古亦有此

見吳曾漫錄

長白山

內大臣覺羅武等謹題為遵 旨看驗長白山事康熙十六年四月十五日內大臣覺羅武等一等侍衛兼親隨侍衛首領臣耀色一等待衛臣塞護禮三等待衛臣索爾等上諭長白山係 本朝祖宗發祥之地今乃無確知之人爾等四人前赴鎮守兀喇地方將軍處選取識路之人往看明白以便酌量行禮臣等欽遵 上諭於五月初四日起行本月十四日至盛京十六日由盛京起行本月二十三日至兀喇地方轉宣 上諭於將軍等隨查兀喇寧古塔及兀喇獵戶所居村莊等處俱無確知長白山之人僉云曾遠望見惟都統

尼雅漢之宗族戴穆布魯原係採獵之人今已老退閑日稱我輩原在額赫訥陰地方居住我雖不曾躋長白山之巔曾聞我父云如往獵於長白山脚下獲鹿肩負以歸途中三宿第四日可至家以此度之長白山離額赫訥陰地方不甚遙遠我不知其他等語因訪問雖不曾至長白山如赴額赫訥陰地方水路幾日可至陸路幾日可至亦有知往額赫訥陰地方陸路之人否據管獵戶噶喇大額黑等口稱如乘馬由陸路前赴額赫訥陰地方十日可至如乘小舟由水路而往途中全無阻滯二十日可至倘遇水漲阻滯難計日期有獵戶喀喇者知赴額赫訥陰地方陸路等語臣等隨議每人攜三月糧而往又思或三月糧盡或馬匹倒斃不能歸家亦不

可定隨語鎮守寧古塔將軍巴海可載一船米於額赫訥陰
地方豫備倘我輩米盡以便於彼處取用將軍巴海云大船
不能過松阿里河大險處當卽載米十七小船至額赫訥陰
地方豫備臣等卽擬於六月初二日起行又思由水路而往
倘遇水漲阻滯稽遲時日不能卽至因與噶喇大額黑約我
輩乘此馬匹肥壯速山陸路往看俟看過長白山回時再由
水路逆流而上前赴額赫訥陰地方約定臣等帶領固山大
薩布素於六月初二日起行經過文德浪河阿虎山庫勒訥
林祁爾薩河庫沱河沙布爾堪河納丹佛勒地方輝發江法
河木敦林巴克塔河納爾渾河敦敦山卓龍窩河等處及至
訥陰地方江干不意噶喇大額黑乘小舟而行半月程途七

四恩匹

日齊至因語固山大薩布素我輩乘小舟由江中逆流前赴
額赫訥陰地方汝帶領官兵馬匹由瓦努湖河逆流而上由
佛多和河順流而下前來額黑訥陰相會約定遣發去後臣
等於十一日至額赫訥陰地方固山大薩布素等於初十日
已至因前進無路一望林木臣等與固山大薩布素商議令
薩布素開散章京喀達與識路徑之喀喇帶領每旗甲士二
名前行伐木開路并諭如望見長白山可將行幾日方得望
見有幾許路程相度明確來報我輩住二日亦卽起行矣隨
於十二日遣發前行去後本日據固山大薩布素差人顧素
前來報稱我等別大人們行三十里至一山頂上望見長白
山不甚遙遠似止有一百七八十里等語又續差艾喀來報

稱先差人來後又至一高山頂上望見長白山甚明約有百餘里山上見有片片白光等語臣等趁未有雨水之時急往看驗長白山因囑噶喇大額黑督捕珠珙於十三日起行十四日與固山大薩布素等會於樹林中揣摩開路前進十六日黎明聞鶴鳴六七聲十七日雲霧迷漫不見山在何處因向鶴鳴處尋路而行適遇路蹊由此前進直至長白山脚下見一處周圍林密中央平坦而圓有草無木前面有水其林離住札處半里方盡自林盡處有白樺木宛如栽植香木叢生黃花燦爛臣等隨移於彼處住札步出林外遠望雲霧迷山毫無所見臣等近前跪誦 綸音禮拜甫畢雲霧開散長白山歷歷分明臣等不勝駭異又正值一路可以躋攀中間有平坦勝地如築成臺基遙望山形長闊近觀地勢頗圓所見片片白光皆冰雪也山高約有百里山頂有池有五峰圍繞臨水而立碧水澄清波紋蕩漾殊爲可觀池畔無草木臣等所立山峰去池水約有五十餘丈地週圍寬闊約有三四十里池北岸有立熊一望之甚小其繞池諸峰勢若傾頽頗駭瞻視正南一峰較諸峰稍低宛然如門池水不流山間處處有水由左流者則爲扣阿里兀喇河右流者則爲大訥陰河小訥陰河繞山皆平林遠望諸山皆低相視畢禮拜下山之際峰頭有鹿一羣他鹿皆奔獨有七鹿如人推狀自山峰陸續滾至山下閒散章京畢楊武里等駐立之處臣等不勝駭異因思正在乏食此殆山靈賜與欽差大臣者隨望山叩

謝收其七鹿臣等上山之時原有七人也自得鹿之處退至
二三十步回首瞻望又忽然雲霧迷山臣等因清淨勝地不
宜久留於十八日言旋回見先望見長白山之處因雲霧蒙
籠遂不得復見山光矣二十一日回至二訥陰河合流之處
二十五日回至恰庫河此河乃訥陰東流會合之所二十八
日正行之際適遇頒到 敕旨臣等不勝歡欣捧讀 敕旨
感激靡盡當經叩頭謝恩訖二十九日因馬瘦不堪馳驅自
恰庫河水路乘小舟而歸經過色克騰險處圖白黑險處噶
爾漢險處噶大渾險處薩滿險處薩克錫險處法克錫險處
松阿里大險處多渾險處乘一葉小舟歷此大江九險得以
無恙而渡者皆仰賴 皇上洪福之所致也七月初二日

回至兀喇地方又往看寧古塔等處地方於本月十二日至
寧古塔徧看會寧府等處地方畢於七月十七日自寧古塔
起行八月二十一日抵京師 等奉 命於人跡罕到之處
創闢路徑行於不見日色深林之內無一日阻滯得見長白
山皆我 皇上敬念 祖宗誠心感格神明之效也緣係
欽差事宜謹疏奏聞奉 旨長白山 祖宗發祥重地奇蹟
甚多山靈宜加封號永著祀典以昭國家茂膺神貺之意着
禮部會同內閣詳議具 禮部覆疏金史大定十二年封長
白山為興國靈應王明昌四年又加封開天弘聖帝明洪武
三年竝去嶽鎮王公封號止稱為神今 本朝祭五嶽五鎮
俱稱嶽鎮之神相應將長白山封為長白山之神相擇吉地

建祠照五嶽例每年春秋二季致祭祭祀所行禮儀應用等物亦照五嶽今未建祠之前應特遣大臣往封致祭其封神祭文及每年春秋二次祭文交與翰林院撰擬工部酌量題請建造祠宇成日始行春秋二祭可也奉旨這建祠致祭事宜着再詳議具奏

山東解元

山東解元在明時仕多不達至順治戊子吾邑伊中丞翁菴以乙未改翰林授御史今至節鉞甲午大嵩趙庶常浮山作舟以己未丙午鄆城魏侍讀子相希敬以丙辰壬子濱州王檢討甲先鼎寬以癸丑乙卯德州李編修紫瀾嵩以丙辰丁巳諸城王編修何思沛思以己未辛酉德州孫檢討子未勳以乙丑

丁卯陽穀劉庶常

琰

以辛未凡歷十五科而入翰林者八人

崇禎紀事

崇禎紀事吳郡姚宗典所著其中紀載多失實而獨於宜興故相盛稱其功又見弘光大記一書亦多出傳聞如云某年月日劉澤清殺其叔孔和孔和長山故相國青岳先生鴻訓子部領義兵至淮澤清忌而殺之非其族也又云流賊偽制將軍某至濟南推官鍾性樸死之鍾字文子順天人癸未進士本朝順治初為濟南府推官後擢提學道予即其庚寅首取士也而謂死流賊之難何也

縣名避年號

順治中改嘉興府崇德縣為石門縣以避

太宗年號也

明穆宗朝亦改隆慶州爲延慶州許重熙五陵注略曰宋時皆改郡邑名以就年號如祥符興之類國初亦以洪武名其門避年號非古也

玄狐

本朝極貴玄狐次貂次獬獬玄狐惟王公以上始得服康熙十一年重定衣服等威之制三品以上始得服貂及獬獬未久復故日講官每歲賜貂自滇中告變停賜康熙十九年乃徧賜講官九人

遵化改州

康熙十六年以孝陵故陞遵化縣爲州以豐潤縣屬之知縣鄭僑生卽陞知州後歷官湖廣提學僉事

鄉飲酒禮

康熙己酉順天府尹疏請八旗一體行鄉飲酒禮從之

池北偶談卷五日錄

談獻六之一 凡二十四則

朱公遣婢帖

畸士

申殷張

韓計

張學士

駱金吾

左良玉

張敞

王烈女

葛端肅公家訓

薦隱逸

蔡卞白敏中

聯語

先忠勤公家訓

忠勤公諸孫

司徒公歷仕錄

方伯公遺事

方伯公同學

方伯公啓人詩

方伯公知人

侍御公殉節

王劉二奇士

節義

封丘古蹟

卷五目畢

池北偶談卷五

談獻

濟南王士禛阮亭著

高都姪廷掄簡菴較

朱公遣婢帖

總河尚書義烏梅麓朱公錫之溫然長者以清慎受知世
 祖皇帝後齋志以歿又無嗣子近見公遣婢帖真盛德事錄
 之以示後生知前輩用心如此帖云前送回張氏女子原無
 大過只是娃子氣好言教導不甚知省誠恐聲色相加流入
 婢子一類所以量給衣飾還其父母初時原是待年五六日
 後便有遣歸之意故自後并無半語諧謔猶然處子也而此
 女臨去時哭泣甚悲既恐人笑又恐人不相信不肖甚憐之

足下可將此女原無大過，完璧歸趙，一段緣由，向其父母中，媒昌言明白，以便此女將來易於擇壻也。康熙中，徐克淮揚間人，盛傳朱公死為河神，十一年，總河王中丞徇民情，疏請建祠濟寧，下部議，寢其事。按公此事與宋張乖崖及明左都御史沂州王公璟事略同，王事見西園雜記。

畸士

杜牧之所記燕將錄，陳同甫所記龍伯康趙九齡事，宋景濂所記秦士錄，近日錢牧齋所記東征二士錄，皆瑰瑋倜儻，鼎革之際，不乏畸士。友人汪荅文劉公載，皆作乙邦才傳。汪又作沈通明申甫傳，予常作劉孔和傳，每欲廣搜成一書，未暇也。

申殷張

永年申和孟涵節愍公長子，有文章志行，以詩名河朔間，同學多為大官。申獨隱居不出，有故人自京師寄書，申報以詩云：日日秋陰命筍輿，故人天上落雙魚。荷花未老新醪熟，為道無閒作報書。其簡傲如此。一時同隱廣羊山中者，有殷岳宗山、張蓋、覆輿、殷工、五言古詩，平生不解為近體，常為睢寧令，輒自罷歸。張善草書，通輕俠，晚值亂離，鑿坏以居，不與人接。人有偵之者，或夜讀經傳，達旦，時或痛哭。張贈申詩云：草澤賢豪盡上書，奎章閣外即公車。我甘漁父因衰老，獨有涵光是隱居。後發狂死，和孟為立傳，刻其遺詩二卷。

韓計

北平韓鼎業字子新流寓中州李空同墓在禹州山十為流賊所發韓收其骸骨葬之吳江計考廉甫草東遊河北訪謝榛墓於鄴西門外為立碣表曰明詩人謝茂秦墓二事皆有古人之風按空同山在禹州與具茨接獻吉本扶溝人且生於汴故取為號歿即葬焉非平涼之空同山也

張學士

辛亥秋 駕將出關謁 陵又有遣大臣巡察之議侍講學士張貞生於乾清門而奏言過蕙下考功議革職為民蒙恩止鐫二級於九月廿二日扁舟南歸學士居富川有講學園即文信國故居也一時賦詩贈行者甚多宋荔裳按察云三殿衮衣何事補西江遷客累朝多高念東侍郎云讀書學

道千秋事士所當為正自多家兄西樵云言聽便為天下福計違不負一生心學士雷別詩云秋風送客復乘船江遠帆孤一夢懸焚草燈前期報國披肝殿上願回天聖明豈是誠難格臣慙還應術未全賴有宗工交勗勉臨岐申贈繞朝鞭張為國子司業時刻鄒南臯先生宗儒語略頗闡陽明良知之說其後乃一宗考亭嘗書邸壁云至危是人禽之介喫緊在義利之關居京師寓吉安館中蓬蒿滿徑突無炊煙瀕行至不能具裝故人餽贐一無所受其狷介如此予亦贈詩三首其一云上殿似聞辛慶忌行吟休擬楚靈均學士尋奉特旨名用 聖主知人之明度越千古矣

駱金吾

駱養性字泰如京師人崇禎朝為大金吾熊魚山開元姜如農
塚二公俱以直言得罪下錦衣獄一日漏下二鼓一小中官
持懷宗御筆至云諭駱某即取熊姜二犯絕命繳駱附奏繳
旨略云言官果有罪當明正典刑與天下共棄之今昏夜以
片紙付臣殺二諫官臣不敢奉詔奏上帝怒為之霽二公皆
得不死駱至順治中尚在宋荔裳嘗識之

左良玉

左良玉偃蹇武昌不奉朝命其東下以討馬阮為名實叛逆
也侯方域為寧南侯傳以私恩語多失實論者猶以是予之
董卓傳卓既廢立乃與司徒黃琬司空楊彪俱帶鐵鎖詣闕
上書追理陳蕃竇武及諸黨人以從人望古來奸賊依倚盜

名類同一轍如此

張敞

廬陵張幹臣學士貞生世祖敞明成化時仕為後軍都督府經
歷嘗以救林見素得罪與陳白沙交善予從學士處見白沙
送別詩手蹟云草閣春風忽兩人坐臨江水看江雲尋常肝
肺詩中寫六十頭顱鏡裏分落絮風驚還著樹行人日出又
離羣布帆遠下南京道望斷梅關不見君張氏以理學直諫
為家學其淵源有自矣

王烈女

張秋王烈女名嬌諸生王碧侯女風姿絕世而駘宕不羈崇
禎辛巳冬張秋被兵將犯烈女女大罵而死血凝河冰經春

不化

葛端肅公家訓

德平葛端肅公爲明嘉隆間名臣東阿于文定公稱大臣有德望者獨推公公與予家世姻婭先太師公長女公孫婦也嘗讀公家訓謹錄數則於左○予初仕爲彰德府推官視府篆遇冬至在趙王府慶賀畢王傳令旨各官卽以朝服見予謂朝王舊禮皆吉服今遽更變不敢從王命長史持一冊來云此書開載應朝服予謂旣非沿習又無素考一旦改度理不可從所持不知何典記未可遽信長史復啓王大怒將引禮官拷掠欲以恐喝長史復來云殿下盛怒不具朝服恐不容見予曰不見亦得卽請於朝違令旨之罪亦可認若不應

服而服則關係甚大各官罪不可測聞寧藩初令各官朝服惟李夢陽不肯事竟如何長史往復良久日已高王遂令照常吉服朝見後見崔後渠公云不圖子有是識有是力也○予在鄴三年餘每公出必自齎盤費縣驛私餽下程俱不敢受嘗至汴城查盤事畢以餘金買銅茶壺一具遇大風雪黃河冰不可渡待於河上仍齎壺以爲途費今聞里甲驛遞之費至於不可紀極如之何民不貧困流亡也○予遇急缺風憲行取時年二十九歲限以十月到部舊例選科道三十以上方得與若遲兩月卽合例子平生謂處事最不可用意纔用意便非順天命故依限赴部呂文選從周詫曰君年二十九例不得選臺省予曰自知無分居數日授兵部主事守山

海關冢宰汪誠齋語左都御史王浚川公曰葛君年二十九更兩月則及格矣渠不肯候是其人亦可取公曰是予山東提學時門生也在彰德甚有聲崔後渠亟稱之公又語予曰君不謀臺省良有見居官何必臺省能稱職卽是好官耳○予鄉平度李正夫以文選副郎改翰林部例一人出衙門則舉同鄉一人爲代武城王舜渠及邢北原先薦予於正夫正夫遂告之冢宰文選皆曰可予素不識正夫特相過訪屏人曰今見鄉兄吾所舉可謂得人且曰呂東匯欲兄一見予有難色正夫又曰兄謂銓曹不易見耶我當同兄一往予曰否否旣已見矣則當有言是涉於求吾弗能也正夫曰今求者多以爲事當出於某故皆不得而兄顧以一見爲難乎予曰鄙志以爲不可求故不能從正夫又曰昨王道思薦李中麓東匯謂某已薦兄今胡如此予曰中麓兩同年也素相厚得吏部猶我也況中麓不在京師豈可令士大夫謂某潛與之爭乎請鄉兄遂薦之正夫乃悵然罷去於是決用中麓矣予詣正夫謝相負之罪正夫曰予初不知兄之高如是山東正氣也吾重之有加於代吾爲吏部矣郭君弼亦稱道以爲君子立身當如是後中麓以文選陞太常值予服闋以予前相讓之意仍欲薦予與冢宰許松臯公暨文選王象山嘉賓言皆允乃作書促予北上時以日淺不可遂行比至都有舊吏部林東城春周棗山卿皆以起復先至中麓甚憾予遲旣數日偶吏部有胡纓溪鯨者不爲衆僚喜議欲出之於外以爲

予地中麓間來語予予曰擠人而奪其位此豈君子之心果如所云予當乞病歸必不忍就也且前日吾能讓兄今顧可攘人乎中麓曰迂哉葛子予曰誠然寧迂勿躁也中麓意乃止越數日祠祭主事缺乃補之○予在山海時陶真人仲文以遼陽庫官任滿回夾帶軍妻至關詰出予發巡捕指揮徐鳳儀問究軍妻解回原衛仲文家人依律問擬追問渠甚啣之渠妻與關民張鸞妻結為姊妹仲文至京有真人之寵鸞與妻遂相往來徐是山緯守關因盤詰武定侯郭勛家人被其誣奏至於逮係仲文語人曰山海主事亦可拿乎意蓋在予也時予以起復至京詹角山語予曰此人不可不防予曰禍福固有定數不能宛曲求解聽之而已予尋補禮部遷選制郎中仲文時加禮部尚書擇日來部到任予與眾僚議不可相見是日當託故皆不入部眾以爲然至日渠來見四司無人各畱一名帖而去竟亦無如之何也○寧府宸濠反同謀者郡王將軍而下若干人本犯皆令自盡家屬發高墻禁錮後命科道官各一人至彼看議姑容回本府爲庶人既得脫禁輒復營謀請封夏桂洲掌禮部時爲之題覆酌量俱准襲中尉女皆爲鄉君已封若干人矣予在儀制有接踵奏請者予查刑部移來原題稿其祖若父皆親同謀反人遂具稿叅駁呈嚴介溪宗伯嚴曰此事桂洲久已准行今遽變易桂老在閣豈不取怪況予亦江西人先已准封我乃叅之人其謂我何予曰郎中亦知桂翁在閣翻異所行必當致怒然法

不可行只得據正題覆意外之禍聽之而已既具題桂洲竟擬旨云某等你部裏既查係謀反者子孫都不准襲今後再有奏擾的治罪不饒全無怒意蓋亦自知先題准之非得此一解亦無後虞也○寧藩逆廢只令弋陽王以本爵管理府事渠乃無涯之心萌初求審理理刑吏部題覆與之既以教授輔導職卑恥同各府奏欲以審理輔導予在儀司參之以爲郡王府止有教授親王乃有審理弋陽王雖理府事爵實郡王據稱添有審理已爲非分今又卑薄教授欲以審理輔導理刑之官非可以兼輔導若如所請將來隴蜀之請又不知其如何所據弋陽王拱橫非望奏瀆祈天語嚴加戒飭雅宜安分恪守成憲無得仍前妄意奏擾自取罪愆奉旨是拱橫屢有奏擾不務安靜着今後恪遵憲章保守祿位毋得聽信撥置自取罪愆明旨昭然宜知警戒各衙門亦當稍知裁抑矣未幾奏乞長史吏部郎選與長史二人又乞校尉兵部又題與校尉五十名其校尉巾帶奏乞照例給與事在儀制司予諭其齋本人曰親郡王各有體制原不相同今弋陽王欲全比親王是入繼親王也何謂以本爵管理府事汝速歸啓王宜安分吾決不與渠曰兵部已與校尉校尉應有巾帶予曰此自兵部大錯校尉可有巾帶決不可得後長史亦竟被言官叅革云○予自陝西布政使入覲帑羨一無所攜有時相子官太常尚寶同衆邀飲亦只照常送一帕儀吏白他省藩司未嘗有以此送嚴管家者而顧以貽其主人恐嗔怪

予曰厚則吾力實有不能相諒與否聽之而已嚴管家者分
宜家人嚴年也○巡撫培養一方元氣不比巡按專有發奸
擿伏之任故貴寬簡長厚予在河南只重循良有司不獎喜
事獵虛名者更嚴禁貪酷之吏常刻木榜曰爾之俸薪皆出
於民更殘民以逞取充囊橐不有明罰必有幽責不於其身
必於其子孫後予在吏部佐中外考察數四舊屬官鮮以貪
墨敗者不可謂無所感乎也然待人而與猶屬庸士若豪傑
則自知砥礪矣勉之勉之○予在吏部四載餘兩推太宰一
次相公各有所託且曰卽以元輔次輔所薦爲正陪予謂家
宰統百官均四海一遂柄用大關君子小人之進退須從人
望烏可徇人竟推南太宰周公延疏上大拂時相意得調旨
另推兩員來看二公復中前請謂閣中已秘揭薦過非此二
人不可予不能從明日東闕會推更推總憲屠公僑一廷相
顧不言而罷予徑出至端門楊虞坡兄趨來同行曰今日之
舉正人增氣多矣兄不見環聽者悚然乎疏上相公大怒果
各具揭薦所囑者且云吏部偏執意見越三日疏揭俱不發
聞上共納袍袖中左右莫測又數日忽宣召吏部守禮趨至
迎和門中官捧御筆特旨出批部疏面云着默復職之任默
者福建李古冲時家居故云聖明總攬乾斷不惑私議兩相
受土谷知之深費許多心計竟不能用一私人豈尋常世主
所及哉○陶仲文旣荷寵異常入直萬壽宮時於便殿賜坐
賜食從容談論聞上兩次詢大臣臧否至守禮則先發云此

朕所素知是在禮部山陝河南有聲者聞他清操如故陶出
輒恚憤累日語其徒曰葛與川公好造化上每訪問諸大臣
便先稱之蓋修舊怨不能遂其中傷也此自鬼神呵護然聖
德高明埒於大造吾子孫當世知所以報稱可也○丙辰自
南京謝政歸里舊宅已推與弟姪輩始自營第一區檢畝中
得二百餘金查莊上畜糧僅數百石於是年期起室一進約
數年竣工興作之費每至稱貸爾輩其知締造之艱兢兢保
守之此宅以有家廟家塾幾世未析百口同居勢不得不從
闢大以後子孫出居每宅寬只許五楹深約三四進勿妄扳
援此宅規制其同爨弟姪輩欲析居時除爾曾祖見產瓜分
之外各與城宅一區鄒莊一所田二頃塋地數畝以稱予親
親之誼○予在仕途三十年今得優游林下於世味淡然相
忘似皆得簡靜力士大夫但有爲名使人喜之心做官就要
矯激自炫以急人知煦煦行惠至違道以要虛譽居鄉必不
能修己遠利表正風俗卽知自好亦多什爲鄉愿之行俟命
君子所謂無入而不自得蓋以立身行己自有法度對不自
失而言耳顧居鄉無難只要在家讀書靜坐不管閑事敦倫
理屏嗜慾勿干請有司禁絕假託用勢者耳若做官要做入
事事念念爲義爲公成敗利鈍皆無足計須先知內外檢點
卓然自立不依阿澳忽附人持法公平宅心忠恕勿恃一守
而輕儕慢民勿爲宦成而肆志傲物兢兢翼翼作事某始凡
自我行務上有益於朝廷下有利於生民而無求赫赫之名

其庶矣。大凡人能清約，卽能秉正，事無不可爲。夫出處一機，爾輩自今卽學廉靜無欲，異日居官自當得力，使人稱爲清白吏子孫可矣。○又二則曰：同年中，天植忠直，吾不如郭君弼。嘉靖癸巳十月，予行取至京，君弼爲御史，暇則相見，十二日夜，星隕如雨，無一人建言者。五日後，君弼過我，曰：兄能爲程舜敷否？予曰：兄欲爲楊實卿乎？蓋楊曾論邵真人下獄，追主使之入，竝逮舜敷，不隱得諡。故談及君弼，因曰：星隕大變，舉朝無言者，我言官也。數日來，其不得已，已草奏矣。兄爲我討論之。疏上三日不下，君弼復過曰：事不測矣。少頃，逮錦衣獄，復奏上，著拿來午門前，打四十棍，錦衣夾拶，已近百矣。兩腿露骨，死而復甦，予視之初，無悔意，旣而巡按蘇松釐奸剔弊，臨滿止，爲朱玉峰建一坊，題曰崇德。爲文衡山建一坊，題曰表節。雖顧味齋在閣中，亦不及也。後遷順天巡撫時，夏桂洲起用南來，各巡撫皆候境上，保定巡撫蘇舜澤以書邀君弼，君弼辭之。未幾，以地方小事，票令閑住。旣以太宰熊北源薦起，督宣大總兵張達，輕出犯敵營陣亡，事出頃刻，君弼駐陽和，相去二百里，比夜始知，給事中唐禹劾其不救，下錦衣械繫，打一百，謫戍鎮魯。今十餘年矣。行乎患難，無所怨。尤忠直之性，挫而愈厲，是吾所矚若者也。雅性格介，吾不如吳汝薦。蓋其幼時，性慕冲玄，故於世味澹然無欲。予在儀制時，汝薦爲戶部郎中，一日來司中，見架上紙十餘刀，問曰：此何用？予曰：將以換書。曰：此官物，換書則其私也。予曰：戶部亦有之。

兄何所用曰公則用餘則貯司庫以待來者後守廬州府治對有山所出柴木舊供府用曰此官物也計其值皆入庫作正數他可知矣母卒於官扶喪歸宅爲水所壞借其族兄房三間停柩且居之不謂陋也繼補保定則宿於堂之東間十日始一入宅廉靜之風僚屬皆化時谷近滄爲屬高陽令深服之巡撫真保時山陝地震閣臣以考察京官應之李南渠任其事九卿以下皆列爲等第汝薦以李同年得在一等與嚴世蕃徐陟陸燿趙文華輩同列渠甚病之時予免歸遺予書曰今次考察及九卿甚異事所謂一網打盡矣吾尚可久居此乎未幾竟引疾歸避居山寺數月不一至其家如此高舉豈吾所及公隆萬間復起歷戶部尚書左都御史功名氣節一代仰之如山斗及其歿後每生忌日禱祀冢祠下輒千百人文集若干卷孫尚寶卿听翰林編修曦刻之家塾

薦隱逸

康熙十年浙撫范中丞薦山林隱逸鄞縣葛世振明崇禎庚辰第二人翰林編修也旣以老疾辭不赴復奉溫旨敦迫再以疾辭遂允其請又薦布衣董漢策以科道試用尋爲御史劾罷至下諸法司而秦督鄂善薦整屋布衣李顥辭不至顥起田峻嘗一就科舉遂隱居讀書修明橫渠藍田之學富平李天生因篤昔嘗爲予言之

蔡卞自敏中

人有不可以一節取者宋史載蔡卞歷揚廣越潤陳五州廣

州寶貝叢湊一無所取及徙越夷人清其去以薔薇露洒衣
送之卽此一事論之雖與沉香載石同稱可也而乃出於卞
之巨姦白敏中在郎署李衛公器之多所延譽遺錢十萬俾
會省閣諸公宴已有日時秋霖涉旬負救惠員外求官不得
將欲出京來別惠與敏中同年閩人告以方候朝官惠駐車
畱書叙瀟遊之困敏中得書歎曰士窮達當有時命豈有美
饌上邀當路豪貴而反遺故人遂召惠先宴旣而朝貴聞與
惠宴衆皆去異日敏中謝衛公以畱故人負於推引衛公稱
之曰此真古人所爲以此一節觀之敏中過人遠甚然史稱
敏中受知德裕薦知制誥尋爲翰林學士至大用及德裕之
貶詆之不遺餘力議者訾惡敏中相業略無足稱怙威肆行

卒諡曰醜而黨附宗閔擯斥衛公尤爲當世鄙薄秦太虛著
論謂敏中不獨負德裕抑且負國家

聯語

張忠定公

延登

一爲司空兩爲總憲以功名著累朝又鄉會試

得人最盛如劉文正理順吳忠節麟徵馮中丞元颺尚書元
颺夏考功允彜及周挹齋延儒輩皆門生也少時見公廳一
聯云門多將相文中子身繫安危郭令公

先忠勤公家訓

先高祖灤川公登嘉靖辛丑進士爲貴州叅議以王事歿於
黔贈太僕寺少卿子六人長贈布政使之翰次戶部左侍郎
贈尚書諱之垣卽先曾祖也次戶部員外郎之輔次淮安府

同知之城次浙江按察使之猷次高陽知縣之棟公教諸子最嚴家訓云所存者必皆道義之心非道義之心勿汝存也制之而已矣所行者必皆道義之事非道義之事勿汝行也慎之而已矣所友者必皆讀書之人非讀書之人勿汝友也遠之而已矣所言者必皆讀書之言非讀書之言勿汝言也諾之而已矣今刻石忠勤祠中先祖方伯公督不肖兄弟恆舉此訓廳事屏壁間亦皆書之

忠勤公諸孫

高祖忠勤公一日擁諸孫膝上時伯祖太師公象乾方伯公象坤光祿公象蒙皆方七八歲公戲問太師曰汝將來中第幾應曰第一問方伯曰第一問光祿亦曰第二公喜其後方伯中嘉靖甲子解元光祿隆慶丁卯太師隆慶庚午皆第二人如其言四伯祖孝廉公象泰癸酉亦第二人其後叔祖戶部公象斗翰林公象節中丞公象恒皆以戊子先祖方伯公象晉以甲午叔祖考功公象春初名象巽以癸卯相繼鄉薦皆成進士向見談薈諸書所載多訛舛詳述之

司徒公歷仕錄

曾祖大司徒公常白纂歷仕錄一卷謹錄數則於左以爲家訓云○予初選荊州府推官出京時卽聞彼地士大夫有好請託者予槩不敢從時如江陵相公乃翁曹都憲年伯紀山公亦不徇從後遂絕無以竿牘來者鄉官薛太守雲澤自京師回傳汪陵公語曰王公大有執持我甚服之○楚撫某公

陞任取荊州杉板二十副計費數百金太守趙公難之以問予予曰公政績甚著且屢登薦牘今送杉板是賄而求薦也不可趙公避之已而薦竟居首趙公名賢汝陽人歷官南吏部尚書○荊州府庫有王府故祿銀遼王差校尉取討未發時孫太守入覲通判王某署府事王提庫吏雷大夏立斃杖下其兄具告撫按俱行推官王三月不發犯人予欲報參長史不得已始發下犯人十四名皆羈監王怒出府往道署署門閉遂至府前登鼓樓予與太守趙公同至鼓樓謁王王怒甚云王推官辱我我何面目管束諸宗儀趙公力辭罷去予隨以事至省過荊門州謁巡撫同鄉谷近滄公公曰王府事不可激予應曰亦不可徇公公曰昔有神童見一老僧僧曰汝進一步則死退一步則亡神童應曰旁行一步亦有何妨子正宜旁行時也予曰云何公公曰子令家累且歸而身出查盤俟王稍氣平仍具文來我再添一官會鞫庶好擔當予曰諾歸卽送家累杞縣令姪象坤處次日遂赴永州月餘回同岳州推官辛君會訊凡問軍一徒五王怒愈甚然竟無所施王素不道後發高牆禁錮云○予爲舉人時以太僕府君忠勤死事入京乞卹時嚴世蕃用事賄賂公行予謂縱賂得之適足爲先人辱遂竟歸歸督諸弟子姪晝夜閉戶讀書相繼成立竟得卹典○予以給事中充正使與禮部員外郎同年蹇理菴公冊封鄭府崇德王事完卽日行餽謝甚腆一無所受理菴與予意同後理菴官至薊遼總督兵部侍郎○穆宗時

陳皇后出中宮中外人心不安予具疏請皇后正位中宮以端治本奉旨后侍朕久無子多病移居別宮以暢意耳汝不知內庭事安言耶再上疏言皇后乃先帝選擇以遺陛下有關雎繆木之德抑鬱成疾已爲不可乃云別宮暢意豈有夫婦睽離而暢者哉奉旨后疾調理稍愈卽還本宮○湖廣有大奸曰何心隱卽何夫山卽何兩川卽梁無忌卽梁光益的名梁汝元本江西永豐人以侵欺皇木銀兩犯罪拒捕殺傷吳善五等六人初擬死罪後得末減充貴州衛軍逃去各省及孝感縣倏往倏來假講學爲名聚衆擾害地方種種不法各省歷年訪緝不獲皆有卷案萬曆七年新店把總朱心學於祁門縣獲之予發候按察使查卷問理已而心隱病死後數年臺省諸公尚有爲何刑寃者蓋以假講學之遂爲所惑實不知其有各省訪拿卷案耳迄今公論始明○予爲戶部侍郎管太倉見倉斛斗其一獨大異常問之云凡糧到倉該倉斗級每人先支一斗此舊規也予曰是何言卽照常私與亦是違法况另置大斗乎卽禁革之是年修總督倉場公署或云此銀例出各倉斗級予曰是烏可行宜乎大斗私索也乃與大司農張心齋公言部發帑金修之著爲例○予平日不囑託官府故入仕亦不徇人請託萬曆十八年太夫人壽日鄉人具軸禮來賀者餘三百人予曰某素不敢管人家閒事有何德於鄉黨敢勞諸君答曰正以公不說事不害人大家陰受其賜故來耳○予初考選刑科卽請益於掌科朱

後菴公繪公曰切記不可聽人主使爲他人報私仇壞自己名節予佩服之後果有具稿暗送欲書予名者急謝去之月餘同鄉一道長却持此本問予予以實告不可染但唯唯越數日竟上之識者駭異果以此敗官○前輩涉歷事久多有高見有疑難事不能自決不可不以咨問予曾有二事一請教兵部侍郎吳公望湖一請教兵部尚書張公心齋二公論甚透切予深服之○予生平得朋友之益居多同學于公華峰等同僚吏部尚書趙公汝泉等同年兵部尚書劉公節齋等劉公在省尤相得予家居劉總督兩廣聞予病書來若疾痛之在其身寄桑寄生藥者再兵部尚書邯鄲張公弘軒總督薊遼書來林下者二每自念未能酬報吾子孫記之報之

○業師魏雲汀先生諱智任知縣同僚荊州府知府趙公汝泉名賢河南汝陽人吏部尚書徐公思重名學謨直隸嘉定人禮部尚書孫公山名用福建人知府江公心源名一麟都御史○省中何公來山名起鳴四川人韓公元川名楫蒲州人通政梁公靜齋名閏孟河南人都御史張公湖東名鹵儀封人都御史丁公觀峰名懋儒東昌人知府朱公後菴名繪平定人少卿溫公一齋名純涇陽人尚書鴻臚寺賈公虛菴名儒雞澤人左少卿○南太僕劉公仁軒名穩衡陽人少卿許公敬菴名孚遠海鹽人侍郎○順天府丞朱公越崢名南雍山陰人太僕卿○戶部張公心齋名學顏肥鄉人兵部尚書劉公紫山名思問孟縣人南戶部尚書楊公夢山名巍

海豐人吏部尚書王公雲澤名廷瞻黃州人尚書王公後齋名友賢寧鄉人尚書○公生平篤於師友魏歲貢智公之師也公既貴常遇諸塗讓其乘騎於魏扶持上下而身跨蹇驢以從鄉人至今稱之

方伯公遺事

先祖方伯公年九十餘讀書排纂不輟雖盛夏衣冠危坐未嘗見其科跣常揭一聯於廳事云紹祖宗一脈真傳克勤克儉教子孫兩行正路惟讀惟耕齋中一聯云容人所不能容忍人所不可忍癸巳歲作自祭文有云不敢喪心不求滿意能甘澹泊能忍閑氣九十年來於心無愧可借衆而同遊可含笑而長逝蓋實錄云公年雖大耄時時夜夢侍先曾祖司徒府君或跪受扑責如過庭時云

方伯公同學

方伯公少在京邸從青州張見堯先生學同學者臨胸馮文敏公琦蒙陰公文介公勳馮與公同年生方伯少兩歲兄事之後為諸生受知提學理菴蹇公達各入書院凡四人則公及濟寧于中丞若瀛臨清柳尚書佐其一即文介也公公萬曆辛丑進士改庶吉士時馮公以吏部侍郎教習庶吉士

方伯公答人詩

方伯公素不喜修煉之說恆揭寧靜澹泊四字於壁讀書眠食外惟瞑坐調息而已嘗有答侯晉陽大叅一絕句云問予何事容顏好曾受高人秘法傳打疊身心無一事饑來喫飯

倦時眠公歿時不肖年二十矣回憶公一言一行真義皇以上人也按饑來喫飯倦時眠乃傳燈錄義海禪師語王陽明與人論學亦曾引之

方伯公知人

二伯祖方伯中宇公象年十八領解為嘉靖甲子明年乙丑成進士歷仕山西左布政使卒官貧至無以殮撫按以下為醵金治後事乃得歸清正名臣也公藻鑑尤精為河南提學時萬曆壬午鄉試榜將發直指問公曰解頭當屬何人公曰杞之周九臯否則汝陽李宗延耳已而周果領解奎次之李公仕至戶部尚書

侍御公殉節

伯父侍御百斯公與登崇禎元年戊辰進士入翰林改御史甲申公家食已八年矣聞三月十九日之變同妻子盡節於几案間得手書一紙云京師卒破聖主殉社稷予聞之雪涕沾衣不及攀龍髯而殉命遂偕妻子氏子和併命寢室命也奈何葬從薄從速隨時也公清介忠信言笑不苟鬚眉若神葬日會者萬人莫不流涕南城陳伯璣允衡論次公遺集比之宋江文忠萬里云崑山歸莊元恭詩云鼎湖痛絕競攀龍城守諸公繼扈從誰是簡書無請責獨捐頂踵又從容九泉骨近平原廟千古名齊日觀峰欣慕執鞭嗟隔世好憑詩句想遺蹤

王劉二奇士

予鄉王遵坦字太平益都人太僕少卿濬之子劉孔和字節之長山人相國鴻訓之子二人皆負氣跣跣相友善土居家桑谷劉居長白皆有林泉之美崇禎間見天下將亂散財結客甲申歲孔和殺闖賊偽令率精騎萬人南赴金陵至淮陰以兵屬劉澤清澤清與孔和素交時爲藩鎮貴重無比然好爲詩一日大會將吏廣坐朗吟賓佐交口譽之孔和仰視獨無語強問之曰公誠名將才然此事定復不急澤清怒罷酒賓客皆惶懼失次孔和傲然而出澤清益怒遣人追及舟中殺之已而金陵以爲副總兵官則孔和死數日矣遵坦入本朝隨肅王平蜀爲巡撫四川都御史卒於閬劉有奕棋贈丘將軍長歌云伏生之里大將出生來所志惟馬革幕中已多指視功疆場血戰不勝筆堪嗟再謁典連敖不知三世還執戟別君十載一瞬間歷盡鋒鏑與楛桎背貴那可入韓非晴白聊足嘲吳刻多君談笑貫索中坐待明光銷蠹蝕昨聞廣武拜軍師聖主懷邦丈人吉如今驅戰真市人聒聒怒蛙誰與軾願君橫臂障東海莫令桑梓生荆棘安有健兒把犁鋤但見春林巢小鳥從來外攘必內安隱憂不在河北賊夜涼浮白戒談事更向局中間切急已知文偉能辦賊不待當場辨白黑贊君斂手推棋枰論兵艾艾終羞吃君功定可勒燕然我詩空須錦罽織王有詩云怪鴟撲人山鬼叫草際幽燐舊年少古冢老狸夜宴賓鬪讎爲盤羅八珍玄熊文豹甘作使噤不敢言但相指夫君意氣不自持拔劍向風劍光死一

身誰遣困蓬蒿呼天喝月未足豪驢脊如柴少韉勒小控風
期非我曹愁多歡少天白頭倒擲河水西向流一寸之心括
千古元氣茫茫生百憂金盆濯足錦爲厠以此相酬已堪恚
寄語聽冰九尾兒鷓鴣啼上寒楓枝劉又有贈王詩云都無
殺者黃江夏豈有食之嚴鄭公後竟死劉澤清手與黃祖事
絕類云丘名磊鄒平人少爲諸生有才名後走遼東詣軍門
上書積功至總兵官佩鎮東將軍印亦死澤清之手

節義

王氏亳州人李殿機妻也殿機父死於法母張氏沒官給配
象房校尉王福殿機因冒王姓繼粥於紅旗厄爾庫家王氏
在本籍年二十四歲矣叔兄強之嫁誓死不從康熙二十八

年覓夫至京師時殿機已配蕭氏矣南城御史阮爾詢具疏
上聞竟爲夫婦殿機蕭氏皆斷出爲民同歸於亳

封丘古蹟

同年岳給事鎮九秀起家封丘知縣有古循良之風唐高達
夫嘗爲縣尉向無專祠岳於西門外勸祠祀之縣南黃池北
嶽牢皆春秋古蹟又有青陵臺韓憑妻冢岳皆爲建祠立碑
表之此事近今長吏所少

池北偶談卷六目錄

談獻六之二 凡四十六則

李太守

重慶三忠

楊太常

二烈女

文柔

二文正墓

張綵

蔡道憲

事叔至孝

張待問

孔公父子

龐嚴

劉富川

張商英

致身錄

劉元子

徐東癡

朱浚

王李

黃熙績

米元章二壻

篤師誼

兩郝天挺本末

孫靈暉

忠勤公黔志列傳

死節

段復興

蔣氏王氏

王應熊

魏尚書格言

家門諭

聖門戒律

圖識

朱彤

馮可宗

劉吏部

王公家書

陳忠愍

曹植司馬順

門戶

元韓

高忠憲

崇禎三相

鄺道元

二王好佛

薛佩玉

卷六目畢

池北偶談卷六

談獻

濟南王士禎阮亭著 高都姪廷掄簡菴較

李太守

近日廉吏以松江知府李正華為第一，正華貢士，獻縣人，予鄉李御史森按，下江誅鉏豪右，有海忠介之風，中讒被逮，吳民號泣攀送者數萬人，既登舟，僚屬皆在相視揮涕，正華最後至，攜一酒瓢，滿酌送侍御，慷慨言曰：吾曹期不愧天目，不愧朝廷，不愧百姓耳。成敗利鈍，造物司之，公今日之行，榮於登仙，諸君何至作楚囚相對耶？侍御掀髯大笑，諸君改容謝之。後以考成不及格，鐫級去。行之日，囊無一錢，松江人醵金

數百強投舟中復人製一衣獻之凡數千領正華一無所受
松人走白巡撫中丞下檄使受之移書慰勉乃量受為行李
之費既歸家騎一驢往來田間歲一至郡城南鼎甫延官河
間時與之往還甚稔予過獻問其所居在縣西門數椽僅蔽
風雨云

重慶三忠

猷賊自荊州上峽攻陷重慶蜀撫都御史陳公上重慶太守
王公行巴縣令王公錫同日罵賊被磔死鄂都林君明儁作
三忠傳今巴人立三忠祠祀之

楊太常

楊懷玉者以琴供奉明懷宗官太常丞鼎革後攜琴流轉

吳越間文士多為賦詩絕似宋末汪水雲也同時有伊爾費
者會稽人亦以琴供奉禁中興化李鏡月滄有長歌贈之悽
婉可誦

二烈女

丙寅六月福建巡撫張仲舉疏言閩縣未婚烈女吳淑鳳從
容盡節矢志靡他連江縣未婚烈女楊聯姐投繯就義百折
不回部議奉 旨旌表

文柔

文柔者李之儀端叔配胡武平宿孫女也為東坡所知呼為
法喜上人東坡南遷手自製衣以贖日我一女子受此等人
知復何憾耶見端叔自撰墓誌

一文正墓

元耶律文正楚材明李文正東隱墓皆在都城西近畏吾村王文
貞公崇簡云為孝廉時見耶律王墓上斷碑尚可讀二十餘年
來墓田歸旗下此碑無從復問西涯墓抔土僅存明萬曆時
有進士王文邁者曾為封樹畿輔八物志云公墓在阜城門
外畏吾村後人式微麗牲之石不復有矣

張綵

張綵焦芳劉宇曹元皆為逆瑾爪牙腹心而綵又其鄉人也
苑洛見聞錄獨稱綵遇止逆瑾功德數事謂大學士焦芳導
瑾為惡劉宇首阿附瑾綵皆勸退之如是不下十餘條孝子
慈孫百世不改而苑洛以鄉曲之故亂天下萬世公是非亦

見其愚矣

蔡道憲

蔡公道憲閩人以進士為長沙府推官數夢與宋李忠節公
芾酬酢後天兵下湖南蔡殉節潭人歲時報賽常見二公往
來車騎甚盛全州謝石長琦記其事云

事叔至孝

宣城施愚山問章少孤事叔譽至孝一日值叔誕辰大集親戚
上壽而叔以小故忤意堅臥不起愚山跪榻前移晷辛亥客
都門每憶叔輒涕泗事叔如此古人所希有也譽有遺詩一
卷愚山屬予為論定序而行之

張待問

予邑新城本長山縣地元始為縣閱長山志名宦宋止知縣
翟大順一人丞簿則有明以前無考適閱東軒筆錄得張待
問一人知志之闕漏多矣張待問為淄川長山縣主簿縣有
盧伯達者與曹侍中利用通如復憑世廢大為邑患縣令憚
其勢莫敢與較張一日承令乏適伯達以訟至庭即數其累
犯杖之未幾伯達之姪士倫來為本路轉運使人皆為張危
之或勸令自免去張曰盧公賢者肯銜隙以害公正之吏乎
了不嬰意一日士倫巡案至邑召張語之曰君健吏也吾叔
賴君懲之今變節為善士矣為發薦章而去待問固不愧名
宦乃士倫亦鄉之賢大夫也錄之以補志乘之闕范文正公
幼隨母改

適長山朱氏筆錄
訛作睢陽宜正之

孔公父子

史載孔道輔原魯使契丹優人以文宣王為戲道輔艷然徑
出澠水燕談載元祐中上元駕幸迎祥池宴從臣伶人以先
聖為戲刑部侍郎孔宗翰奏唐文宗時有為此戲者詔斥之
今聖君宴稿羣臣豈容有此詔付檢官置於理二事絕相類
宗翰字周翰即原魯子也宋至道二年皇太子諸王宴瓊林
苑教坊以孔子為戲賓客李至言
唐太和以此為戲文宗答伶人以懲無
禮魯哀公以儒為戲尚不可況先聖乎

龐巖

因話錄角部載江淮一舉人姓巖登科記誤書龐巖遂賃舟
丐食往壽春謁從事龐尹事極可笑按唐書龐巖壽春人元
和中登進士第元微之喜其文體類己歷太常少卿京兆尹

姓名地里皆巧合其一人耶

劉富川

劉欽鄰字鄰哉號江屏其先江右人籍揚州之儀真順治庚子舉人辛丑進士筮仕廣西富川知縣甲寅賊陷富川劉不屈死之兩廣總督疏聞得旨劉某忠憤死節深為可憫應得卹典從優議奏予在揚州時劉初釋褐識其人恂恂儒素而大節如此可敬亦可哀也適見徐御史敬菴旭疏云守土者必有城存與存城亡與亡之義然後可以固封疆敵愾者必有寧使進尺勿使退寸之心然後可以克大敵今賊來則以請兵救援而出賊退又以隨兵進勦而入守令逃竄而委責任於將弁將弁怠弛而望恢復於禁旅又云國家深仁厚

丁恐士

澤培養臣工三十餘年承平日久文武燕安綢繆牖戶之計不深故捐軀殉國之志不決昔安史之亂杲卿力殉河北故十七郡皆歸朝廷淮蔡之平裴度誓不與賊俱生不決月而掃清巨寇臣就目前事勢而論立欲削平僭逆必先振刷紀綱云真藥石之言也

張商英

宋張商英反復狙詐小人之尤杲禪師與天覺論元祐人才因問溫公如何天覺曰大賢也杲曰相公在臺諫時如何論他天覺曰只是後生時死急要官做故如此予嘗謂便要官做亦何至仆溫公之碑耶吾鄉益都房安洛公可天啓中為御史為東林部黨之魁而晚節不終順治初為溧陽相所逐

時年七十餘矣京師邸舍器用皆自局鑄或以爲言公曰老夫不久當復名耳予嘗問其姪孫星顯云公嘗自言少年血氣盛只是要官做其言與天覺相類孟氏云是集義所生者非義襲而取之也論人者不可不辨

致身錄

虞山極辯史仲彬致身錄之僞而予鄉趙隱君士喆著建文帝年譜多取之劉公子孔和亦有題致身錄一篇云國初殺運烈不除越三十載還相屠以仁守之真不足雖有節士謀多疎哀哉中山誠意輩已盡六計環顧徒嗟吁聖祖信數不建輔使作皇覺之裔餘鬼門一出四十載歸來老佛惟雪顛竄身萬里伏滇國泰伯不得終封吳坳葬西山一笏地豈有方遂之疑乎當時二十有二人左右食屨相攜扶未必才智似狐趙不可及者武子愚二百餘年士最盛摧傷太過今如無千秋直史不可滅帝在均房應屢書

劉元子

光州劉元子黃裳嵩陽先生繪之子也好談兵倜儻負奇嵩陽守重慶銅梁大司馬張襄憲公佳以童子見知愛如已子致署中與元子兄弟讀書時元子十許歲如襄憲之才夜與弟黃鼎潛往縊之賴太夫人走救得免後襄憲開府元子尚在公車過襄憲公酒酣耳熱輒謾罵襄憲遜謝而已元子後以兵部郎叅謀征倭軍事

徐東癡

吾邑徐隱君夜宇東癡又字嵇菴年二十九棄諸生隱居東
臯鄭黃河上掘門土室絕跡城市有朱桃椎杜子春之風癸
亥春予及先兄過之欲約同志爲構草堂又遺書縣令云元
道州狀舉處士張季秀請縣官爲造草舍十數間給水田一
二頃免其當戶徭役令得保遂其志使士庶識廉恥之方又
楊君謙蘇談所記中峰和上草堂乃馮海粟煉泥趙松雪搬
運中峰塗壁吳人至今傳爲美談明府能爲此盛舉繼三公
之後者亦佳話也竟不果

朱浚

盧奕之有祀華原柳氏之有璨韓忠獻之有侂胄吳玠吳璘
之有逆曦所謂君子之澤五世而斬也何燕泉餘冬序錄載
朱文公會孫浚爲浙漕值賈似道當國時每有劄子白事必
稱某萬拜按文公世系公長子塾塾生鑑鑑生浚浚仕至朝
散大夫右文殿修撰兩浙轉運使吏部侍郎丙子元兵至福
安州浚不屈死之浚能殺身成仁而不能不失身於權貴明
末亦有之如張捷楊維垣是也浚死節事宋史及綱目皆不
書

王李

掖縣王漢字子房倣儻有經世才中崇禎丁丑進士爲高平
河內二縣令上書言事懷宗奇之名對擢御史巡按河南進
巡撫都御史死永城賊劉超之難予少見其奏疏及小武當
詩一篇真奇才也同邑李森先字琳枝崇禎庚辰進士入

本朝爲御史屢上疏論事切直三下刑部不少摧折巡按下江清剛端勁真淫僧三拙優人王紫稼於法江南人莫不快之中忌者被逮吳中罷市哭送者萬人世祖廉知之尋內擢卿寺而李不幸死矣李修髯長身飲酒無算家有椒雨園在南郭外日與酒徒酣飲其中醉則衣白衣徒步歌呼過市中憤歎側酒痕狼籍有陽城之風

黃熙績

順治己亥海寇破京口瓜儀寧國等處金陵幾不守寇安慶推官黃熙績力守全城辛丑論功罪監司守令以下死者數十人熙績以前功特擢給事中仍世襲阿思哈番通判李呈詔亦得叙陞員外郎世襲阿達哈哈番黃閩人李楚人

米元章二壻

段拂吳激皆米元章之壻拂字去塵元章有潔癖見其名字喜曰旣拂矣又去塵真吾壻也以子妻之拂南渡後仕至叅知政事激字彥高入金爲翰林學士以詩樂府知名與蔡松年齊名號吳蔡體

篤師誼

汴梁王金章紫綬叅政常從老儒劉文奇學崇禎末劉家沒於水王爲置田園廬舍於蘇門山中後年七十餘病卒爲之營葬情禮甚備予見其哭師詩哀樂有過人者其警句云門無司馬求書使室有黔婁正被妻餘不具錄陶九成載樵李顧德玉葬其師新昌俞觀光事此近之矣

兩郝天挺本末

金元間有兩郝天挺一爲元遺山之師一爲遺山弟子予考元史郝經傳云其先潞州人徙澤州之陵川祖天挺字晉卿元裕之嘗從之學裕之謂經曰汝貌類祖才器非常者是也其一字繼先出於朶魯別族父和上拔都魯元太宗世多著武功天挺英爽剛直有志略受業於遺山元好問累拜河南行省平章政事追封冀國公諡文定爲皇慶名臣嘗修雲南實錄五卷又註唐人鼓吹集十卷元時漢人賜號拔都惟史天澤張弘範見輟耕錄漢言勇也近常熟刻鼓吹集乃以爲隱逸傳之晉卿而致疑於趙文敏之序稱尚書左丞又於尚書左丞上妄加金字誤甚

孫靈暉

新城僻陋其在南北朝則長樂武強二縣地也長樂今青州之高苑武強今濟南之長山偶讀北齊書孫靈暉傳乃予鄉前哲而志不載因錄於此孫靈暉長樂武強人也魏大儒秘書監惠蔚靈暉之族曾王父也靈暉少明敏有器度惠蔚一子早卒其家書籍多在焉靈暉七歲便好學日誦數千言唯尋討惠蔚手錄章疏不求師友三禮三傳皆通宗旨時就鮑季詳熊安生質問疑滯其所發明熊鮑無以異也舉冀州刺史秀才射策高第授員外將軍後以儒術甄明擢授太學博士遷北徐州治中轉潼郡太守天統中令朝臣推舉可爲南陽王綽師者吏部尚書尉瑾表薦之徵爲國子博士授南陽

王經王雖不好文學深相敬重啓除其府諮議參軍綽除定州刺史仍隨之鎮綽所爲猖獗靈暉惟默默憂悴不能諫止綽欲以管記馬子結爲諮議參軍乃表請轉靈暉爲王師朝廷以王師三品啓奏不合後主於啓下手答云但用之仍手報南陽書竝依所奏儒者甚以爲榮綽除大將軍靈暉以王師領大將軍司馬綽誅停廢齊亡數年卒于萬壽聰識機警博涉羣書有辭藻尤甚詩詠齊末陽休之辟爲開府行參軍隨奉朝請滕王文學豫章長史卒於大理司直

忠勤公黔志列傳

先高祖太僕府君死事於黔明世廟諭祭文有忠勤報國之褒故稱忠勤公黔記名宦傳云王重光濟南新城人以進士爲司空曹郎嘉靖中貴州左叅政會赤水黑白羿蠻叛公與叅將於某衝嵐冒瘴癘勤事以死事聞賜祭贈太僕少卿公祠在永寧衛有指揮王之屏張朝者奉委采木不避險艱水漲有巨木閣灘頭朝之屏光卒徒入水掀撥巨木溺死事聞賜葬今從祀公祠墳衣生曰予聞王之先有王叟者與其嫗力田作苦家贏擔食之儲有窮措大夜穿其墉叟覺以戒嫗是偷兒也扼其吭而燭之曰嘻君故儒士而顧穿窬耶夫婦甚憐惜之耳語曰勉旃勉旃吾終不暴君之短因出粟與之庾人無知者太僕蓋其孫云由太僕而後益昌大今所稱新城王是已此傳同年某中丞撫黔時持錄相寄時曲沃衛少師方有纂修一統志之請不一載滇黔告變志未進呈故具

錄於此

死節

富川知縣劉欽鄰死節之後又得數人謹書之饒寇陷浮梁

知縣王臨元死之陷新昌典史諸士英死之臨元山東平山

衛人順治辛丑進士叛將以紫衣誘降不從自縊死浙寇陷武義署縣事蘭

谿丞徐喆死之賊索印力拒而死喆山西廣昌人貢生海寇薄溫州

總兵官祖弘勳迎降巡道僉事陳丹赤死之叛將議脅之降大罵遇害丹

赤福建閩縣人順治辛卯舉人初贈光祿寺卿加贈通政使

司通政使朱龍據定邊堡以叛守備劉士英同其妻妾郭李

俱死之孫崇雅以神木叛榆林道叅議楊三知全家死之三

知順天良鄉人順治丙戌進士其妻氏與二女先死妾氏不死為賊所得大罵遇害

贈光祿寺卿王贈光祿寺少卿喆贈浙江按察使司僉事劉

士英贈叅將世襲拜他喇布勒哈番諸士英贈江南宣城縣

主簿

段復興

段公復興兗州陽穀人明末為秦中監司有威惠崇禎癸未

冬季自成入關西安陷諸郡瓦解賊檄至慶陽公怒裂之斬

其使誓以死守十一月十六日賊陷慶陽公巷戰力竭死之

母夫人妻楊氏妾劉氏宗氏張氏子瑞女成暨婢僕七人皆

自焚死秦人立祠春秋饗祀有禱輒應以此唐段太尉關中

人稱二段云

蔣氏王氏

蔣氏淮安大河衛人許字山陽高昂未娶而昂天女趨喪哭甚哀自矢不嫁每歲寒食必往祭墓今五十餘尚在又康熙十六年閩逆初降巡撫楊熙疏請旌表孝子王鑑女惠貞惠貞年十六許字儒士楊儼儼死謀以身殉家人止之因請奔喪自縊夫柩之側

王應熊

巴縣劉孝廉非眼道作故大學士王公應熊傳頗紀實無諛詞其贊云立朝才子居鄉赫赫峻整方嚴夏日冬雪天資則美聖學未充責人無已若已不洪仗鉞秉旄入相出將遇非其時用違其量民之焦墊其何能淑翰林有餘宰相不足應熊以崇禎癸酉冬內傳入閣辦事不由校小在政府僅五月

攻之者衆遂罷歸歸後弟應熙與同邑戶侍倪斯蕙子天和相軋遂成大獄倪氏傾覆殆盡巴人少之癸未周延儒罷相舉應熊自代詔起田間比至周已賜死陳演不欲其入給應熊止涿州而上疏力辭上以問陳陳對曰此要君之術耳上怒遂勒歸南渡以爲督師專辦蜀寇甫抵遵義獻賊已據成都盜將曾英擁衆數萬駐重慶應熊無師可督蟒衣玉帶端坐受庭謁而已丙戌冬肅王誅獻賊於南部之鳳皇山假子孫可望奔重慶墮其城南入滇黔明年丁亥秋應熊卒於永寧之土城○倪所居有巴字園俯臨城堞南對塗山下有龍門浩擅巴郡江山之勝自題一聯云居臨巴水真成字家對龍門好著書予昔過重慶聞之門人林舉人云

魏尚書格言

蔚州魏環溪尚書象順治中以光祿承養親家居服闋以臨
胸馮相國易齋溥薦起為御史不五載至尚書所著有庸齋
閑話與薛文清讀書錄同旨偶錄數則於此○有不可知之
天道無不可知之人事○好名是學者病是不學者藥○居
大臣而德不純學不粹不如下僚居下僚而政不平刑不中
不如素士為士而理不明學不正不如庶民○偶見水與油
而得君子小人之情狀焉水君子也其性涼其質白其味沖
其為用也可以澣不潔者而使潔卽沸湯中投以油亦自分
別而不相混誠哉君子也油小人也其性滑其味濃其為用
也可以污潔者而使不潔倘滾油中投一水必致搏激而不
相容誠哉小人也○五倫之外無道六經之外無文四書之
外無學○貧賤立品富貴立身方是天地間真男子○成德
每在困窮敗身多因得志○為仙為佛論死後地位為聖為
賢論生前地位此虛實有無之別○世間第一種可敬人忠
臣孝子世間第一種可憐人寡婦孤兒○恭謹忍讓是居鄉
之良法清正儉約是居官之良法○吳芾云與其得罪於百
姓不如得罪於上官李衡云與其進而負於君不如退而合
於道二君皆宋人也合之可作出處銘○父母有過子猶幾
諫諭親於道心無欺慢兄弟有過豈容背誣面吐衷腸誰能
離間匿怨而友良朋所患一人作偽一家習慣骨肉手足譁
張為幻人而異情犬豕之豢

家門喻

魏環溪尚書聖人家門喻略載於左○聖人門觀者自下而上取君子上

達門闕正路三條中行中路狂左路狷右路門闕內外二界喻義內喻

利外門內戒規三節老在得終壯在關中少在色始門內畏

箴三則畏天命則畏大人則畏聖人言則○門內賞罰二格

懷德賞懷刑罰門內才品四種第一種剛毅第二種木訥第三種誦四

種門內課士三等行已有恥不辱君命等宗族稱孝鄉黨稱

弟第二等言必信行必果等門內黜士四等患得患失之鄙夫等

無忌憚之小人等又下德之賊最下等此段自上而下取小門內取士

四科德行一科言語一科政事一科文學一科叩門三法反三隅力叩

排叩憤叩入門一步致知格物○聖人家自下而上孝基

弟址門戶堂室聖人室君子堂善人戶有恆門護家四壁信

四忠三壁行二文壁一向上三階樂之上好之中知之下自外達

內四程權四立三適道二程共學一自內達外四程禮動四程莊

泣三程仁守二程知及一程傳家四法游藝家外依仁家內據德家志道

內成家四事樂忘憂憤忘食誨不倦學不厭

聖門戒律

廬陵張學士幹臣作聖門戒律八條一名穿窬之類多方鑽

者一名患得患失鄙夫資緣以獵一名妾婦阿附取一名壘

斷賤丈夫指為奇一名蟠間乞人望門子一名無忌憚小人

是者擅行者是一名德之賊游移不可一名不遠禽獸橫逆不悛

圖識

漢光武好以圖識決事宣布天下桓譚以此得罪而苻堅以讀識殺王彤王佩此一事過光武遠矣其後乃以識文入五將山竟為姚萇所執當是末路憤憤耶

朱彤

朱彤京兆人隱居不仕閭負使涼以彤與王猛並稱堅以猛為侍中猛表讓於彤其後猛死堅欲南寇引羣臣會議太極殿苻融石越等皆諫彤獨贊之卒致淝水之敗以至亡國此豈景略匹耶處士盜虛聲何代無人

馮可宗

益都馮起震字青方老儒也工畫竹有名啓禎間時號馮竹子有子二人長可賓成進士官給事中好聲伎侍妾數十其弟可宗南渡掌錦衣衛事為馬阮牙爪尤豪侈自恣居第皆以紫檀為窗楹乙酉死於金陵同時有馬文室者貴陽相之廝役也亦官都督金陵破官於其居宅井中淘金得數萬兩或為賦淘金行焉

劉吏部

劉吏部公誠體仁抗慨任俠意氣自許嘗遊睢陽睢陽守贈遺頗厚歸經人家慕問徘徊久之曰此地自佳惜葬不合法不急遷且有奇禍因迂道訪其家其為主人道之曰公誠長者顧力不能遷奈何劉曰是易耳盡解橐中裝與之而去此與漢書原涉事頗相類

王公家書

故尚書王公德完字希泉蜀廣安州人萬曆庚子臨胸馮公
琢菴琦南充黃公慎軒輝同侍皇長子日講退謂王公曰今
日皇長子闕言母后憂危狀殆不自保馮又曰今日之計母
后安則皇長子安而天下安否則危矣須得一人拚性命說
破庶有濟乎王公慷慨起曰此言官責公詞臣可無言然某
言之必死老母弱子以累慎軒矣疏入神宗大怒下詔獄究
問主使之入當是時馮公自分不免王公備任慘毒但云道
路喧傳高皇主使語不及他拜杖謫歸天啓中起廢籍至戶
部尚書公之孫有馮予門人也以公獄中家書及馮黃二公
手札示予敬錄於此家書云十月二十八日男上中宮本蓋

中宮危則皇長子危長子危則宗廟社稷危此回天機括曲
突徙薪上策男赤心為國奮不顧身冒昧陳言致皇上震怒
拏送鎮撫司考訊人臣盡忠報國獨立敢言誰為主使皇上
初震雷霆計且不測幸賴二祖列宗在天之靈皇上夢一金
甲神人持鞭而撻宮殿動搖因此上心驚懼男遂免於廷杖
止繫鎮撫司中出則無期也各衙門上三疏救皆不報男思
人臣為宗廟社稷即死亦不可朽矧仗我祖宗父母積德累
仁今得不死非聖主恩深焉能再造耶萬里長途兩位老母
暮年聞此信息驚惶憂慮恐致成病則不孝之罪無所容於
天地間矣馮公書云千古綱常萬年宗社係兄此舉蓋向來
所言止及國本而兄所言者事之本也烈心奇節與鄒爾瞻

等而所關比爾瞻更大國史野史大書特書不一書矣雷霆之下咎篁慘并百僚悸心千夫隕涕寄九死於九關幸而不死社稷實式靈之既逆隆旨千天譴士之處此當以忠智相兼有身在無忘主恩有舌在無談國事事在身外身在世外鷗波萍跡足寄此生柴車就道形跡宜晦卽遇故舊一夫一馬亦勿受之貂璫滿途百凡寧過慎耳行矣足下相與淺而意則深業已成千秋之事爲千秋之人事事須與此舉相稱令龍逢黃綺合爲一人乃爲全盛若異日出而肩大任建大業則在天不在我然聊以兄之出處卜之也勿煩作報書有所欲言異日覓便相聞可耳黃書略云臣罪當誅今天王聖明此語至當真見古人之心碎如父母反目泣諫不從大杖而走豈須臾忘怨慕哉常有此心自不見直言得罪有毫髮之可矜負也天下人公共大事被兄一肩擔盡所關至大而弟所言欲百尺竿頭更進一步蓋責備賢者愛不能已耳此事孫北海侍郎益智錄載之止言黃而不及馮且錄名臣亦不及文敏何哉

陳忠愍

陳都督福字東海陝西定邊堡人積功至右都督駐夔州予壬子使蜀見之真儒將也與予登夔府東城觀入陣圖謁白帝城昭烈廟奏軍中之樂行酒極歡酒酣送予江岸執手殷勤而別此後予廬居聞陳遷寧夏總兵官尋滇黔告變陳百日尚在夔門時蜀中已陷賊以左將軍印誘之招致百端陳

皆執其使以聞朱龍輩叛亂據花馬池等城討平之進圍固
原朝論方倚為長城謂必辦賊一日賊忽以五百人偽降陳
坦然不疑置之左右陳部下有九營而自居中號令嚴肅日
晡諸營不得相往來夜二鼓降人發難中軍驚擾時大風雪
諸營無敢趣救者遂刃陳取其元去此乙卯冬事也陳忠勇
乃心王室今大帥無出其右其死也 上震悼特贈為公
諡忠愍擢其弟參將奇為天津總兵官壽為光祿寺少卿今
為右通政

曹植司馬順

吳江顧生庶其萬三餘漫筆云三叔周之昨臣實殷之忠臣
也說本陳同父若曹丕篡漢陳思王植變服而哭司馬炎篡

魏習陽亭侯順歎曰事乖唐虞而假為禪名遂悲泣由是廢
黜而卒一公非漢魏之忠臣歟

門戶

吾家自明嘉靖中先高祖太僕公以甲科起家至隆萬而極
盛代有聞人當明中葉門戶紛紜之時無一人濡足者亦可
見家法之恭謹矣先伯祖太師霽宇公諱象出入將相六十
年與葉文忠公沈文端公郭文毅公輩師友之誼最厚故小
人造東林同志錄東林籍貫皆列焉先祖父伯公諱象為禮
部主事時鄉人元詩教韓浚勢張甚以公名聞素有清望餌
以銓曹欲引入其黨公力却之遂觸其怒丁巳以察典中傷
里居者十餘年此其梗槩也至從叔祖吏部象為東林聞人

而才浮於家法始一變矣夏瑗公允幸存錄云辛亥京察孫丕揚主之曹于汴湯兆京佐之而所處湯賓尹王紹徽輩則攻東林者也紹徽有清望而賓尹負才名故秦聚奎直糾其不平丁巳京察鄭繼之主之徐兆吉韓浚佐之而所處皆東林也世之所謂清流者一網盡矣是時有齊楚浙三黨鼎峙齊爲元詩教韓浚輩楚爲吳亮嗣官應震輩浙爲劉廷元姚宗文輩而湯賓尹輩陰爲之主於是宣黨崑黨種種別名宣卽賓尹崑則顧天竣也

元韓

元詩教萊蕪人韓浚淄川人趙忠毅著論所目爲四凶也皆同郡會山東缺銓司先方伯時官儀制主事同鄉前輩皆屬意元韓欲攘以爲德冀爲之用屬張華東公廷通殷勤時伯祖太師以薊督召入中樞公曰朝廷威柄惟銓與樞詎有兄在本兵第復爲銓曹者力謝辭之元韓怒不附已遂以察典中傷夏考功云丁巳之察不平彌甚竟無一人起而爭之者蓋在朝清流驅逐盡矣諒哉先是癸丑考選諸公皆以名德首推公時太師方以大司馬名寓家書曰弟以資望應得臺省且欲假歸俟考選後乃入弟卽迴避例亦當改翰林公復書言王事孔棘且君命不宿於家不可以弟故遲君命卽具呈迴避公生平恬退如此

高忠憲

高忠憲公自言少年以氣節自許以此一念受譴亦不畏及

得罪遠竄值風雨困臥舟中數日天晴霽登岸入旅店中忽推窗見桃花爛然遂有悟并氣節之想亦冰消矣

崇禎三相

夏瑗公云烈皇英明勤敏自當中興而卒致淪喪者以輔佐非人也庶幾如范景文之博大好賢方岳貢之清勤憂國不失賢相惜用之稍晚謝陞不徇物情不違公論三公於二鄙皆虛公不滯但闖寇之難范死節最烈照耀千古方以直精微房入內聞變卽自縊爲僕所釋欲再縊而寇已入受刑至慘終不屈死或惜其死稍晚然大節終無貶也謝又出方下矣

酈道元

酈道元史稱嚴猛爲中尉汝南王悅嬖人丘念弄權縱恣道元收付獄悅請於胡太后太后赦之道元殺念并劾悅時蕭寶寅在關中反狀已露悅遂奏道元爲關右大使行至陰盤驛遇害世但知其文士耳

二王好佛

王右丞兄弟好佛多與名僧游處其山川梵宇之作往往精妙然唐書王縉傳載縉喜飯僧徒對揚啓沃輒以因果爲證每西番有警輒使羣僧誦仁王經禳之大曆刑政日以凌遲縉又縱弟妹女尼等廣納賄賂如市賈焉孟子謂頌詩讀書必知人論世旨哉言乎

薛佩玉

予年來訪求殉節者謹書之近又得貴州都勻知縣薛君殉節狀於同年子吳雯天章薛君諱佩玉山西芮城人辛丑進士出予友李宮詹容齋之門為人孤介質直臨事不苟康熙十三年正月十一日滇逆至都勻戍將及兵士數千人內叛脅受偽印薛君不可登樓自縊僕薛策薛健救之曰汝誤我非愛我也急麾去遂死其子鏞今為諸生

池北偶談卷七目錄

談獻六之三 凡四十四則

陳氏

畢孺人

馬文肅家書

蘇門孫先生言行

蘇門三賢

王董兩烈婦

刁蒙吉

左翼宸

范呂二公

長白先生

丘方山

沈文端公家書

施允升

王端毅公遺事

楊斛山先生

楊以齋

王東臯

丘文莊

耿公祖孫

周將軍

三公薦人

自比古人

史閣部

乙將軍

任太守

南尚書

李忠定公從祀

趙忠毅公擇言

王維王縉同名

邢太僕

左公遺事

左公母

朱子論蘇王

李忠定公

二蔡後

牧齋詩傳

元人

康馬

孫太僕

戴京兆

重師

抱松女

蘇少公葬地

白氏

卷七日畢

池北偶談卷七

談獻

濟南王士禛阮亭著 高都姪廷掄簡菴較

陳氏

康熙十五年丙辰春甘肅撫臣疏稱會寧縣典史汪玉虹妻陳氏被執罵賊不辱投井死得旨給銀三十兩立貞烈碑

畢孺人

叔祖翰檢公諱象節字子度中萬曆壬辰進士選庶吉士第一元配畢孺人年甚少於邸中從容立嗣告於墮前自縊死奉旨旌表馮文敏公琦為傳此葬有雙鶴翔於墓所良久而去彈園雜誌云萬曆乙未夏翰林檢討王象節病危妻畢氏

皇迫自縊家人覺之救免夫卒竟閉戶縊死辛亥夏戶部主
事陳原道卒妻計氏哀慟不食淚盡血出死於柩旁道臣皆
請旌表從之卓哉兩烈婦事正相類紀之以勸天下之為人
婦者偶閱此錄附家乘

馬文肅家書

無錫馬文肅公世奇以崇禎辛未登進士報至日其父涵虛公
夢人告曰忠臣不事二君又少時夢自吟從今別却江南日
化作啼鵲帶血歸之句後果殉甲申之難其答成忠毅公德
二柬云吾輩舍一死別無法吾不為其難誰為其難者國家
大運一身大數總有天主之天予我以成仁取義固無憾也
勉之吾輩正不必遜古人耳又云讀教所謂是母是子諫之

敬之成忠毅公德東云慷慨仗節易從容就義難吾輩將為

其難乎抑為其易乎又東云弟幸老母舍妹俱在此老母爭

欲先引決弟止之以從容慷慨二義為告弟志在為其難懼

變起倉卒我輩無以自明故復以二義相商也文肅自跋云

玄升忠毅字一門四人俱死吾一室三人庶可相匹妾朱氏李氏俱贈孺

人士夫多有削髮為僧者雖於身體髮膚受之父母之義未

免有礙然亦不得已之苦心彼念上猶在南也與兒書略云

忠孝二字是吾家風好守之一姐先死朱氏玉潤後死李氏女流

得之尤稱殊節吾可無憾矣玉潤父母可善視之又云吾少

於夢中曾吟詩二句云云此文文山語也曾向汝母言之舊

歲又夢汝祖父語我曰汝六十一歲羈星在命過不得或謂

必無是以中一填起金星為恩星也今成我以千秋之節又有兩侍妾為我添此光彩何必非恩乎特與汝識之公孫翀字雲翎康熙壬子舉人年少有志節工詩文不愧家學與予善惜早卒未見其止耳

蘇門孫先生言行

蘇門孫徵君鍾元先生奇逢以康熙乙卯卒年九十二矣其自贊云問爾為誰曰歲寒氏歲既云寒爾何為爾曰幼讀書安意青紫長知立身頗愛廉恥雖困公車屢蒙薦起骨脆膽薄不慕榮仕衣厭文繡食甘糠粃隱不在山逸不在水隱於舉人七十年矣繞膝多男及門有士老而學易欲探厥旨聊以卒歲如斯而已○先生十四歲謁楊忠愍子尚寶補庭補庭

問設在圍城中內無糧芻外無救援當如何先生應聲曰効死勿去尚寶歎曰足卜子生平矣○天啓中左浮丘魏廓園周蓼洲三公以瑞禍被逮皆先主與鹿忠節善繼之父及其甥婿張于度果中周旋於患難之中左公弟光明魏公子學泚周公友朱祖文皆主其家又與高陽孫文正公書曰左魏諸君子善類之宗橫被奇冤誰不扼腕昔盧次梗一莽男子耳謝茂秦以眇布衣行哭燕市曰諸君子不生為盧生地乃從千載下哀湘而弔賈乎李獻吉在獄何仲默致書楊遠菴求為引手康德涵義急同調至不自愛其名浮丘廓園之品固當直踞獻吉何次梗敢望某一介書生尚負慚於茂秦閣下功德前無遠菴憐才扶世之感諒必激於中豈無意乎及三

公死各半。贖數千。先生又與鹿太公。釀金代上之。先生晚年語門弟子云。吾生平尚友凡三變。乙丑丙寅之際。則慕陳太丘郭林宗。癸甲之間。則管幼安田子春。今耄矣。其惟衛武公乎。○奉聖夫人客氏弟光先。介所知以名馬貽先生。以家貧不能具。芻菱辭。光先再致養馬之需。以病軀不能乘。辭。○先生常語門人曰。讀有字底書。要識無字底理。又曰。予五十年始識得一貧字。嘗有詩云。爲人百歲只爲子。學道終身總學貧。定力原從貧處得。猿啼鬼嘯也成鄰。○先生家祭儀注略云。晨起櫛沐後。入祠三揖。自入小學。便不可廢。○朔望日焚香拜。○元旦昧爽。設祭四拜。四仲月。用分至日。各設祭。行四拜禮。子孫供職事。○凡佳辰令節。寒食寒衣。皆拜設時食。○忌日設食。拜子孫素食。不享客。○有事出門。焚香拜。歸亦如之。○吉慶事。卜期設祭。○兒女婚嫁。焚香以告。生辰彌月。設食以獻。○新婦廟見。設祭。主婦率之行禮。○凡祭。婦人另行禮。各如儀。○先生嘗題壁云。人生最緊戀者過去。最冀望者未來。最悠忽者見在。夫過去已成逝水。勿容繫也。未來茫如捕風。勿容冀也。獨此見在之頃。或窮或通。時行時止。自有當然之道。應盡之心。乃悠悠忽忽。姑俟異日。諉責他人。歲月虛擲。良可浩歎。○先生孝友堂家規云。邇來士大夫。絕不講家規身範。故子孫鮮克由禮。不旋踵而辱身喪家者多矣。祖父不能對子孫。子孫不能對祖父。皆其身多慙德者也。家中之老老幼幼。夫夫婦婦。各無慙德。此便是義皇世界。孝友爲政。

政孰有大焉者乎。○先生前後廬墓六年，常言少年妄意功名，自雙親見背後，哀痛窮苦中，認取本來面目，覺向來氣質之偏。○先生嘗言七十歲工夫較六十而密，八十歲工夫較七十而密，九十歲工夫較八十而密，湯孔伯斌云：先生之學以慎獨為宗，以體認天理為要，以日用倫常為實際。○康熙甲辰，先生以大難錄一事牽連北上，途中語門人曰：憂患恐懼，最怕有所一有所則我心無主，古來忠臣孝子義士，惕息只是能自作主張，學者正在此處着力。○先生病革時語學者云：近得一語實為要訣，但未敢拈以示人，許平仲能化老僧還俗，此語通徹天德王道一齊了貫。

蘇門三賢

張果中，字于度，容城人，少從學於江村鹿公。善繼崇禎中殉難，贈大理寺卿。左浮丘魏廓園，罹璫禍被逮，皆主其家，牧齋贈以詩，所謂夕陽亭下頻畱客，廣柳車中每貯人，是也。後從孫徵君入蘇門，高蹈遠隱，卒葬夏峰村北原，徵君為之傳。彭了凡，蠡縣人，舊為諸生，甲申後遊河朔，依徵君以居，土人授粟不受，竟坐死。嘯臺旁徵君題之曰：餓夫墓。理鬯和字寒石，西華人，本姓李，恥與闖逆同姓，改今姓，有詩文若干卷，亂後散軼，徵君嘗貽書西華左令，恤其老母幼孫，稱為魯連後一人，予嘗作蘇門三賢詩云。

王董兩烈婦

王貞烈，孔氏，河南儀封人，進士貞壇女，適諸生王碧壺，碧壺

肅敏公七世孫也。乙巳七月，夫死自縊，以殉。死三日，父母往哭之，目忽開，移時而瞑。董烈婦，孫氏，山東福山人，歸萊陽董樵子道廣，道廣死，亦自縊將死，語其弟曰：歸語父母，勿悲我。父母劬勞，無以為報，是所以報耳。貞壇先兄門人。

刁蒙吉

刁蒙吉先生，包祁州人。天啓丁卯舉人，隱居講學，曾見其潛室劄記二卷，錄二條於左。○為蓋世豪傑，易為慊心聖賢。難○易言趨吉避凶，蓋言趨正避邪也。若認作趨福避禍，便誤。

左翼宸

左翼宸先生，光應州人。少失愛於繼母薄氏，以孝聞。後舉孝廉，為嵩縣令，闖賊寇其境，竭力拒守，城陷被執，將殺之。薄以身蔽先生，泣曰：我繼母也，見事我孝，願以身代。孝兒賊感而釋之。居鄉一介不取，冬常單衣，有老蒼頭世實者，製絮衣以進，曰：主人義不他受，此衣寶力所營，願主人安之。竟力却不受。所著有知非集。

范呂二公

范文忠公夢章，景甲申絕筆云：坐臥小樓，竟亦難耐。故此決絕。萬曆中文忠為東昌府推官，時維陽呂忠節公維為兗州府推官，後同入為吏部郎。天啓甲子乙丑間，同以忤璫歸。崇禎中，又相繼為南京叅贊、兵部尚書。文忠撰忠節太翁墓誌，謂予與介孺，生平行徑，臭味無一不同。卒皆以大節著。呂公子兆琳，字敬芝，順治己亥進士，官御史，與予善。孫履恒，康熙

甲戌進士謙恒癸酉舉人

長白先生

元張慎與名臨讀書長白山中淹貫經史生徒千里負笈屢
徵不起學者稱長白先生元明善完顏令去思記云與齊處
士張臨善楊廉夫撰鮑孝子志又載先生至元間由丘園官
至祭酒狀元張夢臣中丞張朴大叅張誠等皆先生門人又
鄒平縣北地名河溝有先生爲其父阡表中自云爲司業貳
上庠僅半載與廉夫言相近元太史與先生同時記稱處士
不知何謂今長白山五龍池上有三賢祠祀伏生范文正公
及先生也嘉靖中鄒平丞朱仲恩夢一丈夫冠服朴異不類
時人自稱予有名無爵世所稱長白先生者乃太學生張松

遠祖也松嘗記其事姪孫中丞仁軒公元曾孫尚書華東公
延登建先生祠於縣東七里尚書爲之記

丘方山

丘方山名鳳河南新安人以刀筆仕至南京龍驤衛經歷少
讀小學大學中庸禮記躬行有德日以朱墨二圈記別理欲
有弟蕪其田以爲己分田多瘠先生卽以己田易之已而沃
弟田復蕪先生又易之初仕獻縣丞稱清官第一後自南京
告老歸居方山下鄉黨以爲錢宣靖公後一人先生與洛陽
九西川時熙友善西川門人孟雲浦化鯉狀其行呂忠節公
維祺作諡議予於纂修明史時曾以其行狀諡議送史館

沈文端公家書

歸德沈文端公鯉家書一通略云王父母賜福會央大哥往謝否爾已後只以不相見為主寧可禮節上差些勿要開了此端出入公門招惹是非且受勞苦拜客只可騎馬不可乘車家下凡百儉素恬澹不要做出富貴底氣象不惟俗樣且不可長久大抵盛極則衰月滿則虧日中則昃一定之理惟有自處退步不張氣燄不過享用不作威福雖處盛時可以保守近者江陵張老先生一敗塗地只爲其榮寵至極而不能自抑反張氣燄以致有此可爲明鑒我今雖做熱官自處常在冷處必不肯多積財貨廣置田宅使身終之日留下爭端自取辱名爾能體我此意凡百學好已知持滿之道只愁爾一向做得門面大了無富之實有富之名日後子孫不免

受累爲今之計要減些田土損些受用衣服勿太華美器用寧可欠缺畱些福量遺與後人此至理也秋夏糧及早上納多加與些火耗各莊上人常約束他莫要生事捨與窮人綿襖一百箇趁早預備親戚中貧者孤寡者闕暮年光景頃刻可過何苦如此只圖灑落爲快也我求歸之意已與申老先生說過尚未見許沈埭近日頗知讀書坊牌旣不能止隨府縣建在何處只是不可妨礙人家旣有自備木料官木料不必用之又寄子域云昨相知有書云地氣自南而北今吾鄉人半入南中矣此段似爲四明相而發予跋之云右歸德沈文端公家書一通字字聖賢忠恕之旨予欲續名臣言行錄因從宋牧仲所借歸手錄藏之然以文端公敬慎如此而猶不免四明

之忌仕路真可畏哉公爲先伯祖太師公隆慶辛未會試房師其文集正續稿皆太師序刻之

施允升

宣城施允升先生猷愚山之祖也萬曆中倡明講學私淑盱江羅近溪與鄒南阜焦澹園諸公遊嘗有羅姓者兄弟鬩牆先生要之家反復勸譬聲淚俱下兄弟遂相抱而哭先生爲之講學歌詩三日始散去其叔祖某絕產千餘金應歸先生一介不取捐爲義田以贍族又置義學以教族之子弟所著有中明子集若干卷

王端毅公遺事

三原王端毅公遺事凡四十則公子康敏公所述夏曰京邸偶得一編讀之因錄一二則以自警○公家法甚嚴子孫雖孩提無敢嬉笑於側盛暑中必使著衣襪始侍左右嘗曰敎爾曹讀書非爲利達計也正欲使知爲人底道理○公謝政後有一通家子在官寄茶一簍公受之後復寄二簍亦受之但答書云令先君爲時名臣吾子宜清白律己勿替家聲何勞爲老夫之故數數寄贈吾受之心甚不安此後勿再寄寄亦不受矣○公門人蔡虛齋發志錄一條云公嘗問今學者滿天下何故異才難得予對云是固有由上之人所以養之者本未盡其道下之人又幸際時之昇平而售之急耳以生所見言之如生稍知章句訓詁人便舉而進之於學宮矣未幾作經義甫成篇便得補廩又未幾作三場文字便期中舉

人中進士矣。一中進士，則官已到手，或無暇於學，或自以爲無用學矣。其仕而能學者無幾。蓋識見既淺，踐履必薄，規爲必粗，非所謂俟其熟而食之者也。況自幼入小學，所學多非學做人之實事，人才之不如古，以此。公曰：然。吾兒子承裕，今年二十三，丙午年，已中舉人。然吾未欲其急於仕，且令靜覽羣書，間閱世務，冀他日得實用爾。承裕卽康敏公，仕至戶部尚書。

楊斛山先生

富平忠介斛山楊公，清節冠一時。其以建言罷出都，夫人乘一驢，公自步從。三原馬谿田光祿生日，聲伎滿堂，聞公至，急揮去，設蔬醢相對而已。關中士大夫至今能言之。公裔孫紹武，順治己丑進士，與予友。嘗遺公文集。

楊以齋

海寧楊以齋

建

通政。予同年進士，知高要縣，入爲給事中。初

上諫獵疏。

世祖皇帝震怒，親幸南海子，召九卿以下，至

瞭鷹臺，然後召楊入，諭以安不忘危之意，責以沽名。天威

甚厲，衆皆爲危懼。然

世祖實獎其敢言，有意進用之。康

熙初，彗星見，上天變，修省疏，廷議遣滿洲大臣巡方，上疏止

之。凡所論奏，皆關天下大計。給事中舊司封駁，久廢不行。楊

獨行之，直聲震一時。

本朝諫官當以齋爲第一，御史當

以李琳枝

先

爲第一，銓曹當以王東臯

伯

爲第一。天下公論

如此。

王東臯

王東臯伯勉河南湯陰人丙戌進士久於銓曹一介不取恆居官廨雖胥吏亦服其清正同年范印心以平陽監司入覲念其貧懷金將遺之約同年館卿錢縱同往語久之卒不敢言而退寒冬惟一羊裘數年不易也御史李某過湯陰見其居室卑陋歎其清節特疏薦之時王已自選郎改御史內陞京卿歸里上有意以都御史召竟未及用而卒海內惜之滿洲總憲某嘗歎鹽法之弊合肥龔端毅公曰古云有治人無治法但以兩淮付王伯勉兩浙付魏象樞各加僉都御史久任何患鹽政不肅清乎

丘文莊

丘文莊公濬著世史正綱持論嚴正至其為相則逐三原王端毅公惡莊定山欲誅之何其明於論古而闇於立身如此

耿公祖孫

館陶耿大參明成化丙午舉人弘治丙辰進士官御史以忤劉瑾謫官累官山西叅政其曾孫中丞如杞字楚材亦中萬曆丙午舉人丙辰進士廷對甲第悉同官遵化道副使以忤魏忠賢為閹黨巡撫劉詔所誣逮繫累官山西巡撫干支狀貌無一不同中丞孫願魯亦中康熙丙午舉人庚戌進士今為翰林編修

周將軍

前明崇禎十五年本朝大兵入畿輔山東次年始北歸封

疆大帥無敵一矢加遺周將軍遇吉時調防天津大兵至巡撫馮元颺令出戰周以五百騎伏楊柳青大兵至邀擊之自辰鏖戰及酉其夜大兵徙營北去聞滿洲諸公言壬癸入關之役往來數千里如入無人之境惟見此一戰耳周後與其夫人禦闖寇死偏關最烈

三公薦人

明弘治中聞朶顏將入犯孝宗召閣臣劉文靖謝李二文正三公議遣廷臣整理邊關糧草初擬顧佐王儼上云掌印須畱管家當各衙門官先生輩知之可舉其有才力者三公退擬侍郎陳清李士實以進上改批用都御史劉仲宇通政司叅議熊偉按士實南昌人武宗時佐宸濠爲大逆不識當日

三公何以薦之

自比古人

王儼自比謝文靖張濬自比裴文忠王昭遠自比諸葛忠武侯

史閣部

康熙二十一年吳江吳漢槎光自寧古塔歸京師驛防將軍安某者老將也語之曰子歸可語史館諸君昔王師下江南破揚州時吾在行間親見城破時一官人戴巾衣氈騎一驢詣軍營自云我史閣部也親王引與坐勸之降以洪承疇爲比史但搖首云我此來只辦一死但慮死不明白耳王自方勸諭終不從乃就死此吾所目擊者史書不可屈却此人云

乙將軍

乙將軍邦才山東青州人以總兵官隨史相守廣陵同日授命

任太守

任民育山東濟寧人中甲子乙榜為揚州知府亦不屈死志皆軼之

南尚書

王部尚書渭南南公二太_{益居}巡撫福建時紅毛番以明月珠珊瑚樹異香火馬諸珍寶物賄請互市公絕其使焚其貢物口占一詩云明月珊瑚貴莫言番書字字誑軍門牙前立下焚珠令不敢持將獻至尊授部將以方略討之繫其酋高文

律閩人立石平遠臺以紀公績此崇禎間事也康熙六年丁未五月荷蘭貢使卑獨攀呵閩等入貢時公姪廷鉉為主客郎中與予共事為述之如此

李忠定公從祀

宋南渡人物李忠定公第一張魏公生平不強人意處甚多而為宋齊愈劾罷忠定尤南渡治亂之關予往讀名臣言行錄恆欲著論以明之頃見鄧左之_履張浚不當從祀歷代人王廟議明白正大千古定案遂為閣筆其略云建功於中我之際首當聯絡公忠之人宋至靖康建炎之間人臣皆以緘默柔媚輸國於人為奉職而以恢復雪恥為不忠宋齊愈黃潛善汪伯彥之徒其尤也非李綱秉國整立規畫何以成朝

廷哉浚乃甘以身爲潛善客與齊愈厚而隱其書立邦昌之罪劾綱以私意殺侍從致綱罷黜綱罷而兩河相繼淪陷失身非類得罪君子雖有隨時倖立之功名而其虧喪已不可贖矣夫從祀重典也謂宜黜浚而防綱云劉有仰止堂文集清峭可誦

趙忠毅公擇言

康熙丁未讀高邑趙忠毅公閑居擇言謹錄數則於此○太宰陳公有年與選予爲主事一日謂予曰僕不敏必多過失幸教之予曰人惟清淨日復一日安得有過陳公大笑曰是謂我不作事也因議用海公瑞何公以尚二公皆廢棄而剛直爲天下所畏陳公力言於政府竟皆起之○沈戶部榜湖

廣臨湘人嘗一再見予予癸巳春得罪歸戶部送之郊予抵里未幾而使人來書曰夏季領俸念大賢家居而碌碌如榜乃食祿於朝可恥也謹以原封奉上予受之○大臣以道事君不可則止非以位言也如是乃爲大臣耳故魯兩生可爲大臣近日如太宰孫公鑰陳公有年蔡公國珍可以爲大臣矣孫太宰不揚楊少宰時喬可惜也而楊更可惜以其廉慎耳○近日講學者薛文清之外崔後渠而已所謂極高明而道中庸者也○論語之文和平沖雅如楚狂衰鳳之歌莊子所載乃其全文而論語刪之若迷陽迷陽等語斷不可濶入論語中知此則知文體矣○宋災伯姬以待姆不至而死左傳謂其女而不婦女待人婦義事也是時伯姬六十矣以待

姆不至寧死於火此婦德之至也而曰不婦以爲婦與女不同可不待姆而逃火豈不謬哉○荷蓀丈人遭亂世而農隱而子路以爲無義以爲亂倫然則孔子所謂無道則隱非耶論語之文此爲難解○寺人勃鞞晉文公之讎也及卽位而見之初不肯見旣而見之曰不見者是吾惡心也吾請去之人孰無惡心皆能去之則爲善人矣○宋鄂州知州羅願以父汝楫爲御史時常附秦檜論岳武穆不敢入武穆廟一日自念吾政善姑往祀之再拜遂卒鄂州廩廩爲乾道淳熙間名臣其卒朱子尤痛惜之恨未見其止鄂人感其德爲之圖像以祀歐陽宜諸曰願素行無愧於侯其卒也未必侯所爲意者善惡之報不於其身則於其子孫欒盈非爲汰而受欒

廩之惡以殺其身亦理之或然者予謂羅公賢者以其父之構陷武穆而又近於其廟愧恨不敢入五內切劘久矣一旦瞻其遺像大命遂頌惜哉小人之子孫惟宜愚不肖耳稍賢智則其苦皆若鄂州求死不得也按元鄭師山玉序鄂州小集以爲南渡後文章有先秦西漢之風者新安二羅大羅名頌嘗知鄂州小羅名願卽鄂州也字端良號存齋乾道二年進士爾雅翼卽其所著也○宋太祖出兵下江南後主遣其臣徐鉉來將以口舌勝趙普屢請擇館伴鉉乃中批差三班院下名使臣以往鉉反復問之其人聲啞言不識字而已鉉無如之何也卽此一事太祖之智過普遠矣所謂無言誰敢酬可爲處世之法

王維王縉同名

唐書宰相世系出琅邪文憲公儉後者有蘭州刺史景景子

續秘書郎好時丞昱昱子維此別一維縉也又河東王氏始
趙州司馬儒賢儒賢子揚州司馬知節知節子協律郎曹曹
子汾州司馬處廉處廉子五人長維字摩詰尚書右丞次縉
字夏卿相代宗又次縉江陵少尹次絃次統太常少卿又太
原王氏始右武衛大將軍靖靖子右金吾衛大將軍瓌瓌子
縉太子詹事爲雁門郡王智興之父太原節度使宰之祖又
別一王縉也宋王縉嚴州人官右司諫忤秦檜者凡四王縉

邢太僕

吾鄉太僕邢公子愿侗以書法文章名神宗朝然其行誼甚
高初知南宮縣同年渭南南公憲仲工書爲棗強令會御史
按真定皆在郡候察而南公病歿後事一無所備先生直入

白御史曰南棗強死無爲經紀後事者某願請旬日之假馳
往治喪畢事後赴郡聽察幸甚御史素重公名許之竟爲停
察事聽往治喪至今南氏子孫感公高誼不忘御史亦賢者
惜逸其姓字

左公逸事

左公懋居親喪至孝不出戶者三年拈燭終追遠題文讀者
無不泣下一日縣令夢天帝榜其門云大孝格天又其從弟
某家有狐爲祟先生時在京師家書偶及之先生復書云邪
不干正可善諭遣之書未至一日狐忽語家人云公在都諭
我使去我何敢留遂無他公浩然之氣通乎鬼神如此

左公母

徐烈母寧海州儒家女萊陽左公母也知書有大節明崇禎
甲申左公啣命督餉江左母居京師三月京師陷公從兄吏
部郎懋泰以車載母聞道東歸而身與張尚書忻郝侍郎晉
徒步以從至白溝河仰天歎曰嗚呼此張公叔夜絕吭處也
呼懋泰前責以不能死國吾婦人身受國恩不能草間偷活
寄語吾兒勉之勿以我爲念又見二公責之曰公大臣也除
一死外無存身立命處二公勉之言訖而死蓋出都不食已
數日矣與左公之死相距僅一載萊陽宋孝廉林寺隄爲予
說

朱子論蘇王

孔文仲號正人而攻伊川至謗爲五鬼之魁朱子以蜀洛之
故甘心蘇氏更有甚焉其與汪尚書書云蘇氏之學害天理
亂人心妨道術敗風教不在王氏之下其徒若秦觀李廌皆
浮誕輕佻士類不齒云至其推尊張浚全以南軒交誼甚矣
不黨之難也可歎

李忠定公

周益公云淳熙末李忠定諸子皆不存其姪申之進公奏議
請謚於朝孝宗似未習其人予爲歷陳本末上曰張浚比耶
有司請以忠定易名制口可嗚呼忠定豈浚之比哉孝宗賢
君忠定名臣同時而不相知如此則忠定在紹興中其棄置
屏斥不亦宜乎

一 蔡後

沈才傳
文丞相云。蒲中有二蔡。其一派出君謨。其一派出京下。京下子孫。漸其先人所爲。多自詭爲君謨後。予頃見江右齒錄。分宜相子孫中式者。竟不列其高祖名爵。孝子慈孫。自世不改。可畏哉。

牧齋詩傳

錢宗伯牧齋作列朝詩傳。本仿中州集。欲以庀史。固稱淹雅。然持論多私。殊乖公議。略舉一二。如徐有貞。陸完。以桑梓之故。一則稱其文武兼資。一則舉其功在社稷。欲以一手揜萬古。人耳目。可乎哉。李文鳳。月山叢談云。徐有貞。力主南遷之議。及貞性險賊。云。今吳人舉其鄉望名臣。以有貞爲稱首。上自士濟之下。及今時能言之士。莫不皆然後世宜有公論。固不始於牧齋也。

元人

元名臣文士。如移刺楚才。東丹王突欲孫也。廉希憲。貫雲石。畏吾人也。趙世延。馬祖常。雍吉部人也。孛術魯翀。女直人也。迺賢。葛邏祿人也。薩都刺。色目人也。郝天挺。朶魯別族也。余闕。唐兀氏也。顏宗道。哈刺魯氏也。瞻思。大食國人也。辛文房。西域人也。事功節義。文章彬彬。極盛。雖齊魯吳越衣冠士。何以過之。

康馬

武功康狀元德涵。三原馬光祿伯循。相友善。康詞鋒如雲。言不出口。或斬之。伯循曰。但聽德涵言論。自足快意。何待吾

言

孫太僕

孫沙溪太僕緒故城人博雅有風調嘉靖間嘗著無用閑談四卷頗足解頤然持論時有過偏如駁考亭陽明俱為已甚又載彭文憲時信星士談命言公百四十餘歲當有腹疾彭謂家人曰爾曹謹識之是年勿進吾生冷按此乃五代王祚事載宋人小說何得駕言文憲以此推之其紀述未必盡實錄也

戴京兆

戴京會初名曾子京字型遠杭州人登順治己丑進士官山東提學清方孤峭人不可干以私所拔皆一時名士與施愚

山

先後齊名內陞大理寺丞予告久之起補稍遷順天府

章

丞再予告歸幅巾野服參學徑山絕迹公府人品為武林第

一康熙辛酉卒兩子亦相繼卒天之報施善人何如哉先兒

子側為諸生戴拔第一復拔充貢賦最蒙擊賞每侍坐奉教

如父兄焉

重師

漢人最重其師門生故吏至有棄官行服者荀爽師事李元禮貽書云久廢過庭不聞善誘陟帖瞻望惟日為歲直如子事父矣薄俗要當知此贈以爽父淑為師

抱松女

宣城諸生羅愷妻孫氏年始笄遇兵亂從姑避山中松下兵

獲姑將殺之，孫亟出請以身代，兵脅之去，孫抱松大呼曰：「死耳，義不可辱。」遂見害，三日猶抱松不仆，人呼爲抱松女。

蘇少公葬地

眉州嶽顛山有老翁泉，葉石林云：東坡晚亦號老泉居士，墨莊漫錄云：蘇黃門薨於許，王定國作挽詞云：「徒泣巴山路，空悲蜀道程。」弟兄仁達意，千古各垂名。注云：公與東坡常泊巴江，夜雨相約，伴還蜀，竟不果歸。今東坡葬汝，公歸眉，王祥有言：「歸葬仁也，留葬達也。」又少公自作頴濱遺老傳云：「先君之葬，在眉山之東，昔嘗約耐於其廬，雖遠不忍負也。」又卜居賦序云：「昔先君相彭眉之間，指其庚壬曰：『此而兄弟之居也。』今子瞻不幸，已藏邾山，子年七十有三，異日當追蹈前約，昔貢

少翁爲御史大夫，年八十一，家居琅邪，一子年十二，自憂不得歸葬，元帝哀之，許以王命辦護其喪，譙允南年七十二，終洛陽，家在巴西，遺令其子輕棺以歸，今予廢棄久矣，少翁之寵，非所敢望，而允南舊事，或可庶幾，其賦云：「諸子送我，歷井捫天，庶幾百年，歸掃故阡。」按長公葬汝州郟城縣釣臺鄉上瑞里，嵩陽峨眉山，少公耐焉，今河南志并載二公墓，而四川志止載老蘇墓，不及少公，定國之詩遺老傳卜居賦之語，豈不果耶？外兄徐東癡後適書來訂此疑，因書此復之。

白氏

白氏許州人，蘇宗之母，頴濱先生五世孫婦也，年二十餘，卽寡，外家迎歸，竊議改醮，白氏微聞之，牽車徑歸，曰：「我爲蘇學

士家婦乃失身乎於宅東北爲祭室畫兩先生像圖黃州龍川故事於壁香火嚴潔躬自灑掃金天興元年許州被兵白拜辭兩先生前曰兒子往京師老婦死無恨卽自縊於室年七十餘見金史列女傳

